

Zoux Yesu Sai-Gorx Nyei Fuqv



**Zoc caux Porv Nyei Mienh:
Zeuz, Yauzsing
2013**

Gorngv Jiex Gorn Nyei Waac:

Janx meiv guoqv nyei waac heuc "*disciple*", fai, mienh nyei waac heuc "sai-gorx" - se Yesu heuc gan Ninh weic zunh kuv fiex mbuox lungh ndiev nyei mienh. Maako 1:16-17 "*Yesu yangh jauv gan jienv Gaa^li^li Koiv-Dorn hlen mingh wuov zanc, buatc i dauh zorqv mbiauz nyei mienh, Simon caux ninh nyei youz An^ndaa^lu, yiem wuov koiv borngz mbiauz. Yesu mbuox ninh mbuo, "Meih mbuo daaih gan yie oc. Yie oix njaaux meih mbuo lorz mienh hhangv ih zanc meih mbuo lorz mbiauz nor"*. Mbuo buatc ninh mbuo zoux nyei sic, "*Ninh mbuo liemh zeh guangc ninh mbuo nyei mungz, gan jienv Yesu mingh aqv.*" (Maako 1:18). Yiem naaic hnoi daaih Yesu fih hhangv nyei heuc mienh gan fai sienx ninh zoux Ninh nyei sai-gorx. Yesu daic liuz aengx nangh daaih, ndangc ninh nzuonx mingh Tin-dorng, Yesu paaiv ninh nyei sai-gorx mbuo "*Weic naaiv, meih mbuo oix zuqc mingh njaaux maanc fingx mienh zoux yie nyei sai-gorx*" (Matv^tai 28:19). Yesu laengz jienv gorngv, "*Yie yietc liuz caux meih mbuo yiem taux baamh gen nyei setv muez*" (Matv^tai 28:20).

Siex Yesu mienh se Yesu heuc cuotv daaih nyei mienh fai jiu-baang mienh; Ceix sai-gorx se laanh laanh jiu-baang fai sienx Yesu mienh nyei gong. Naaiv se benx Yesu paaiv laanh laanh sienx Ninh nyei mienh horpc zuqc zoux yaac funx benx longx haic nyei fuqv bun taux laanh laanh mienh. Mbuo mingh mbuox mienh zoux Yesu nyei sai-gorx se benx mbuo dau Yesu paaiv nyei waac, benx muangx waac nyei mienh zoux nyei sic. Zoux Yesu nyei sai-gorx fai sienx Yesu nyei mienh oix zuqc zoux ei jienv Ziouv nyei waac. Janx nyei waac heuc "*disciple*" fai sai-gorx wuov joux waac se jienv nyei yiem Ging-sou. Yiem Siang Ngaengc Waac, longc 269 nzunc. Yesu mienh wuov joux waac longc 3 nzunc hhangv, Siex Yesu mienh longc 2 nzunc. Biux mengh gorngv zoux Yesu nyei sai-gorx se jienv. Jiu-baang nyei gong fai zunh doz mienh nyei gong se maiv zeix kungx mbuox mienh daaih sienx Yesu bun ninh mbuo mbuo haih benx "Yesu mienh" hhangv, mv baac bun mienh haih benx Yesu nyei "sai-gorx". Mbuo hiuv duqv zoux Yesu nyei sai-gorx se da'yietv oix zuqc zipv Yesu zoux Ziouv (Lugaa 14:25-33).

Janx nyei waac gorngv "disciple", Mienh nyei waac heuc "sai-gorx" wuov joux waac maaih eix-leiz gorngv "hoqc nyei mienh", mv baac benx Yesu nyei sai-gorx nyei mienh nyei eix-leiz se gauh ndo. Zoux Yesu nyei sai-gorx nyei mienh se hoqc nyei mienh dongh zipv Yesu njaaux nyei waac, maiv dan yiem sienx fim mv baac yiem ziangh maengc. Zoux Yesu nyei sai-gorx nyei mienh zipv Yesu njaaux nyei, zoux ei Yesu zoux nyei. Maaih eix-leiz gorngv, mbuo hoqc Ziouv nyei waac fai Ging-sou weic oix ei cingx hoqc. Naaiv se benx yietc nyungc sai-gorx mienh ganh ginv zoux, ginv mbuoqc, ginv yangh gan Yesu yangh nyei jauv.

Ih jaax hnoi zoux Yesu nyei sai-gorx fai sienx Yesu mienh camv maiv hhangv zinh ndangc zoux Yesu nyei sai-gorx nyei mienh. Maiv hhangv zinh ndangc nyei sai-gorx siev jienv nyungc-nyungc gan jienv Yesu mingh (Maako 10:28 *Bide ziouc mbuox ninh, "Mangc gaax, yie mbuo guangc nzengc nyungc-nyungc daaih gan Sai-Diex."*). Ih jaax mienh sienx Yesu daaih, fai oix zoux Yesu nyei sai-gorx, weic oix mangc gaax Yesu hhangv haaix nor haih tengx ninh mbuo. Laaic duqv gan jienv mienh daux gaux nyiemc zuiz liuz maengc maiv yienc ei Yesu njaaux nyei waac yaac duqv nyei mv bei. Ei Ziouv nyei waac yiem Ging-sou, zoux Yesu nyei sai-gorx se maiv zeiz hungheic, maiv zeiz liemh zeh la'guaih ginv zoux. Zoux sai-gorx se yietc seix maengc, maiv zeiz haih guangc fai dingh. Ih jaax maaih camv laaic duqv sienx Yesu fai zoux Yesu nyei sai-gorx se hungheic, ziouc sienx Yesu liuz yietc liuz maiv haih hlo, maiv caux Yesu yangh, maiv caux Yesu juangc maengc ziangh. Maengc duqv longx nor hungheic sienx Yesu nyei, buangh zuqc sic nor za'gengh tuix bouc hhangv zinh ndangc maaih deix tuix bouc

neyi sai-gorx nor (Yo^han 6:66 "*Yiem naaic daaih Yesu neyi sai-gorx camv neyi tuix bouc, maiv gan Yesu aqv*"). Weic zuqc Yesu gorngv Ninh ganh se yungz maengc neyi nyanc hopv. Haaix dauh daaih lorz Ninh, wuov dauh yietc liuz maiv ngorc. Haaix dauh sienx ninh, wuov dauh yietc liuz maiv nqaatv. Ih jaax hnoi, Yesu yaac fih hngangv neyi lorz m'jangc lorz m'sieqv dongh ziepc zuoqv neyi maaih hnyouv gan, maaih hnyouv sienx, maaih hnyouv zoux Yesu neyi sai-gorx, dongh sienx duqv wuonv maiv tuix bouc neyi sai-gorx.

Mbuo oix juangc jienv hoqc taux zoux Yesu neyi sai-gorx neyi maengc, zoux Yesu neyi sai-gorx neyi fuqv, yaac oix orn taux zoux Yesu sai-gorx neyi mienh.

Content/Hoc-Dauh:

- 1. Zoux Yesu Nyei Sai-Gorx Mienh Nyei Fuqv**
- 2. Zoux Yesu Sai-Gorx Mienh Nyei Maengc**
- 3. Zoux Yesu Nyei Sai-gorx Mienh Nyei Zorngh Zengx**
- 4. Zoux Yesu Nyei Sai-Gorx Mienh Nyei Ginv**
- 5. Zoux Yesu Nyei Sai-gorx Mienh Nyei Ziouv**
- 6. Zoux Yesu Nyei Sai-gorx Mienh Nyei Doic**

© 2013 Yauzsing tov doqc caux hoqc neyi laanh laanh mienh tengx jienv zorc caux dimv naaiv buonv sou. Se gorngv haaix laanh mienh oix longc gunv dorh mingh aamx cuotv (copy) duqv neyi, se gorngv aamx cuotv daaih weic fu-sux Tin-Hungh. Tov Ziouv bun zoux Yesu neyi sai-gorx neyi mienh haih maaih orn lorqc caux buangv hnyouv benx Ninh neyi sai-gorx, zuote Ninh neyi nyungc, ei Ninh neyi eix ziangh, maiv daan weic ih zanc duqv neyi fuqv mv baac weic mbuo sienx Yesu Giduc ziouc duqv yietc liuz neyi maengc.

For more resources/Maaih sou caux doz yiem: www.yauzsing.wordpress.com

1. Zoux Yesu Nyei Sai-Gorx Mienh Nyei Fuqv

Ging-sou: Matv[^]tai 5:11 *"Meih mbuo weic yie zuqc mienh gorngv doqc, zoux doqc, zuqc mienh gorngv nyungc-nyungc waaic nyei jauv, meih mbuo ziouc maaih njien-youh aqv."*

Gorngv Jiex Gorn Nyei Waac:

Mbuo doqc Ging-sou yiem Loz Ngaengc Waac nyei mienh buatc cing nyei gorngv taux mienh zuqc zioux weic zuiz yiem loz ngaengc waac nyei ziangh hoc. Yiem Siang Ngaengc Waac jiex gorn buatc fuqv benx Tin-Hungh nyei laengz nyei waac. Yiem Loz Ngaengc waac nyei ziangh hoc baamh mienh piatv maiv ei Tin-Hungh nyei leiz ziouc zuqc zioux zuqc dingc zuiz. Yiem Siang Ngaengc Waac sou, maaih siang liepc jiex nyei laengz ngaengc waac bun mbuo weic Yesu nyei nziaamv mbuo maiv buatc lingc caux leiz hngangv Loz Ngaengc Waac heuc mbuo maiv dungx zoux naaiv maiv dungx zoux wuov - mv baac yiem Siang Ngaengc Waac nyei ziangh hoc se "Yie oix ginv, yie laengz ginv weic duqv nyei fuqv..." Yiem Matv[^]tai 5:3-13 Yesu jiex gorn gorngv taux zoux ninh nyei sai-gorx nyei mienh dongh mbuoqc ninh nyei mienh, duqv nyei fuqv. *Yesu buatc mienh ndongc naaic camv, ninh ziouc faaux norm mbong mingh zueiz, jienv. Ninh nyei sai-gorx mbuo yaac daaih yiem zunv.* Mienh camv yiem wuov mv baac dongh Yesu njaaux nyei, ninh njaaux ninh nyei sai-gorx mbuo. Yesu oix bun ninh mbuo bieqc hnyouv caux buangv hnyouv caux orn lorqc yiem ga'nyuoz, maiv dan kungx yiem ga'nyiec minc zinh nyei sic hngangv. Yaac oix sai-gorx mbuo hiuv duqv zoux ninh nyei sai-gorx nyei jaax-zinh caux ziangh maengc nyei cih cunx ndorqc. Yesu njaaux nyei doix-dekc caux baamh gen caux baamh mienh bieqc hnyouv taux fuqv nyei jauv, orn lorqc nyei jauv, caux a'hneiv njien-youh nyei jauv.

Maaih mienh camv sienx gorngv, se gorngv ninh mbuo butv zoih, maiv maaih baengc, maiv maaih youh nzauh, maiv maaih mienh hoic fai ging-borqc, maaih gong longx, maaih mienh taaiah ninh mbuo se benx njien-youh orn lorqc fai duqv longx nyei fuqv aqv. Mv baac Yesu njaaux nyei se doix-dekc taux mienh camv hnamv nyei jauv. Yesu gorngv jomc, maaih nzauh, maaih ngorc, maaih zuqc mienh hoic nyei mienh maaih orn lorqc. Zien njien-youh caux orn lorqc se hngangv naaiv. Janx nyei waac heuc "blessed", mienh nyei waac se njien-youh fai fuqv fai dongh bun mienh a'hneiv nyei.

Gorngv mengh caux muonc Ging-Sou nyei Eix-leiz:

A. Biei Nzangh Fiem Fingx/Juqc Setv Yiem Njien-youh caux Duqv Fuqv Nyei Mienh.

1. Zieqv duqv ganh nyei lingh wuonh qiemx zuqc Ziouv nyei mienh. Matv[^]tai 5:3

"Ganh hiuv duqv ganh qiemx zuqc Tin-Hungh wuov deix, maaih njien-youh aqv, weic zuqc maaih Tin-Hungh zoux Ziouv gunv ninh mbuo". Zieqv duqv ganh jomc qiemx zuqc Ziouv nyei mienh, maiv zeix jomc baamh gen nyei ga'naaiv. Jomc qiemx zuqc Ziouv nyei mienh zieqv duqv ganh se maiv maaih yietc nyungc, maiv maaih za'eix haih njoux ganh fai haih biaux duqv ndutv zuiz, ziouc mingh lorz Tin-Hungh. Dongh naaiv nyungc mienh za'gengh maaih njien-youh fai maaih dongh mienh camv korh fiqv nyei weic zuqc ninh mbuo zieqv duqv yaac hiuv duqv ganh nyei lingh wuonh qiemx nyei, hngangv mienh ngorc hnaangx mienh lorz buatc mbiauh nyei lingh ndeic nor (Tin-Hungh). Naaiv nyungc duqv nyei se Tin-dorngv guoqv, duqv Tin-Hungh zoux ninh mbuo nyei Ziouv.

2. Nzauh taux ganh nyei lingh wuonh, zieqv duqv ganh nyei zuiz, hnyouv mun taux zuiz nyei mienh. Matv[^]tai 5:4 *"Maaih you-nzauh wuov deix, maaih njien-youh aqv,*

weic zuqc Tin-Hungh oix tengx jaiv you-nzauh." Naaiv se maiv zeiz maiv a'hneiv nyei mienh duqv a'hneiv. Maaih you-nzauh nyei mienh duqv njien-youh se hhangv haaix nor? Weic zuqc ganh zieqv ganh ganh nyei lingh wuonh qiemx zuqc nyei ziouc nzauh taux ganh nyei lingh wuonh nyei jauv. Naaiv nyungc you-nzauh se ndo jiex nyei nzauh. Nzauh taux zuiz, hnyouv mun taux ganh nyei zuiz, hnyouv mun caux nzauh taux zuqc dingc zuiz nyei jaax-zinh, nzauh weic lingh wuonh qiemx zuqc nyei.

Zoux sai-gorx nyei mienh haih zoux dorngc i nyungc taux naaiv yiemc Ging-sou. *Da'yietv nyungc* se laaic duqv zoux sai-gorx nyei mienh fai sienx Yesu nyei mienh maiv horpc zuqc a'hneiv, njien-youh. *Da'nyeic nyungc*, laaic duqv zoux sai-gorx nyei mienh fai sienx Yesu nyei mienh zanc-zanc zuqc a'hneiv njien-youh. Gorngv Seix Zang Sou nyei yietc dauh guai nyei mienh gorngv, "*Nyungc-nyungc maaih dingc nyei cun-ciou. Yiem lungh ndiev maanc sic maaih dingc nyei ziangh hoc. Maaih ziangh hoc nyiemv, maaih ziangh hoc jatv. Maaih ziangh hoc nzauh nyiemv, maaih ziangh hoc cangx heix*" (Gorngv Seix Zangc 3:1,4). Maiv maaih yietc laanh mienh haih ziangh duqv buangv cuotv liuz ninh buangh zuqc naanc zingh nyei jauv. Zoux Yesu nyei sai-gorx nyei mienh yaac fih hhangv nyei maaih ziangh hoc zuqc mun zuqc kouv weic bun mbuo haih bungx hnyouv caux haih hlo yiem Ziouv. You-nzauh nyei jauv se maiv zeiz nyungc-nyungc waaic. Yesu gorngv, "*Meih mbuo ih zanc ngorc jienv yiem nyei mienh maaih njien-youh aqv, weic zuqc meih mbuo oix duqv nyanc beuv. Meih mbuo ih zanc nyiemv jienv nyei mienh maaih njien-youh aqv, weic zuqc meih mbuo oix duqv jatv*" (Lugaa 6:21). Duqv Yesu orn mbuo duqv Ninh nyei waac orn mbuo se benx njien-youh nyei maiv zeix duqv you-nzauh nyei sic. Yiem you-nzauh nyei sic duqv Ziouv orn se benx njien-youh nyei. Weic duqv Yesu nyei waac tengx jaiv you-nzauh.

3. **Gunv duqv ganh nyei mienh, Matv[^]tai 5:5** "*Hnyouv suonc wuov deix, maaih njien-youh aqv, weic zuqc Tin-Hungh laengz bun nyei, ninh mbuo oix duqv zipv nzengc*". Hnyouv suonc wuov joux waac nyei eix-leiz se hhangv maaz zuqc mienh njaaux liuz, maaih qaqv mv baac gunv jienv nyei qaqv. Yesu gorngv ninh se hnyouv suonc nyei mienh. Baamh gen mienh gorngv mienh zoux dorngc meih nor oix zuqc jauv win. Yesu gorngv maaih njien-youh fai duqv fuqv nyei mienh se hnyouv suonc nyei mienh. Hnyouv suonc zuov Ziouv, hnyouv suonc zuov jienv duqv dongh nga'haav hingh duqv nyei, maiv zeix ih zanc minc zinh duqv.
4. **Ngorc Lingh Wuonh nyei jauv nyei mienh, Matv[^]tai 5:6** "*Ngorc oix zoux horpc Tin-Hungh nyei hnyouv wuov deix, maaih njien-youh aqv, weic zuqc Tin-Hungh oix bun ninh mbuo duqv buangv eix*". Duqv buangv eix se maiv zeix "oix haaix nyungc duqv wuov nyungc" nyei, mv baac dongh zien-zien ngorc zoux horpc Tin-Hungh nyei mienh, maiv dan ngorc weic duqv njien-youh fai duqv fuqv, mv baac za'gengh duqv caux Tin-Hungh horpc hnyouv. Zien-zien duqv njien-youh orn lorqc duqv fuqv nyei mienh ngorc Tin-Hungh, maiv zeiz weic dongh ninh mbuo duqv nyei ga'naaiv. Hhangv Ndaawitv fiev yiem Singx Nzung 42:1 "*O Tin-Hungh aac, yie nyei hnyouv ngorc meih hhangv njaih ngorc ndoqv nyei wuom-daaiah nor*". Duqv njien-youh orn lorqc nyei mienh se weic ninh mbuo maaih hnyouv ngorc Tin-Hungh ziouc duqv buangv eix duqv caux Tin-Hungh horpc hnyouv. Mbuo oix zuqc lorz Tin-Hungh, maaih hnyouv lorz cing-nzengc nyei jauv, Tin-Hungh cingx bun maaih zien njien-youh caux duqv zien fuqv.

B. Biei Nyungc "Hnyouv" Yiem Maaih Njien-youh caux Duqv Fuqv Nyei Mienh.

1. **Zoux Yesu nyei sai-gorx nyei mienh oix zuqc maaih korv-lienh mienh nyei hnyouv, Matv[^]tai 5:7** *Korv-lienh mienh wuov deix, maaih njien-youh aqv, weic zuqc Tin-Hungh oix korv-lienh ninh mbuo.* Korh lienh dongh maiv zic duqv nyei mienh. Se gorngv mienh zic duqv duqv nyei nor maiv qiex zuqc mbuo korh lienh aqv. Maaih mienh haih maaih hnyouv ngorc Tin-Hungh, maaih hnyouv zoux cing-nzengc nyei mv baac maiv maaih hnyouv korv-lienh mienh. Korh lienh mienh nyei mienh haih buate ninh mbuo ganh yiem mienh buangh zuqc nyei sic ziouc hiuv duqv mienh nyei hnyouv. Naaiv se Singx Lingh nyei yietc nyungc biouv. Maiv ze aev, buate mienh buangh zuqc nyei sic, mbuo haih gorngv mienh, ngopv mienh, daanh mienh. Korv-lienh mienh nyei mienh zoux cuotv daaih maiv dan yiem hnyouv hngv. Korv-lienh mienh se maiv zeiz a'hneiv mienh zoux nyei zuiz fai congh mienh zoux zuiz, mv baac maaih hnyouv zieqv duqv Tin-Hungh nyei en yiem ganh nyei maengc, ziouc kuinx zoux zuiz nyei mienh heuc ninh mbuo goiv hnyouv guangc zuiz. Maaih hnyouv korv-lienh mienh nyei mienh ziouc duqv Ziouv korv-lienh mbuo.
2. **Zoux Yesu nyei sai-gorx nyei mienh oix zuqc maaih cing-nzengc nyei hnyouv. Matv[^]tai 5:8** *"Maaih cing-nzengc nyei hnyouv wuov deix, maaih njien-youh aqv, weic zuqc ninh mbuo oix duqv buate Tin-Hungh".* Maaih cing-nzengc hnyouv nyei mienh haih mangc duqv cing Ziouv nyei mauv bun taux ninh mbuo nyei maengc. Mangc ga'nyuoz maiv zeiz ga'nyiec. Tin-Hungh mangc buate dongh mienh mangc maiv buate nyei. Duqv zipv Tin-Hungh nyei njien-youh fai fuqv za'gengh jaaix jiex. Maiv gunv maaih cong-mengh mv baac maiv maaih cing-nzengc hnyouv maiv haih duqv buate Tin-Hungh, maiv zeiz gorngv bieqc hnyouv taux fai hiuv taux, Weic zuiz torngv jienv bun mbuo maiv haih buate cing Tin-Hungh. Cing-nzengc se maiv maaih zuiz, maiv maaih orqv nyei, maiv maaih beih zangc hnyouv njuotv nyei...Kungx Tin-Hungh ganh haih bun naaiv nyungc hnyouv fiouv bun mbuo nyei hnyouv cing-nzengc hngv.
3. **Zoux Yesu nyei sai-gorx nyei mienh oix zuqc maaih kuinx mienh zoux horpc nyei hnyouv. Matv[^]tai 5:9** *Kuinx i bung mienh horpc hnyouv daaih maaih baengh orn wuov deix, maaih njien-youh aqv, weic zuqc Tin-Hungh oix nyiemc ninh mbuo zoux ninh nyei naamh nyouz.* Kuinx mienh zoux horpc, hngv Yesu ganh zoux nyungc zeiv nor, ninh daaih daic weic bun mbuo caux Zangc Diex horpc hnyouv. Maaih hnyouv kuinx mienh fai oix mienh horpc hnyouv se longx haic weic zuqc naaiv se doix-dekc taux baamh mienh nyei hnyouv. Baamh mienh maaih nzorng, maaih hnyouv im. Weic Yesu bun mbuo duqv caux Zangc Diex horpc hnyouv (Lomaa 8:1-5), mbuo zoux sai-gorx nyei mienh oix zuqc zoux fih hngv. Lorz qiangx caux longc qiangx kuinx mienh daaih sienx kaux Yesu ziouc duqv caux Zangc Diex horpc hnyouv.
4. **Zoux Yesu nyei sai-gorx nyei mienh oix zuqc maaih ziepc zuoqv hnyouv. Matv[^]tai 5:10** *Weic zoux ei Tin-Hungh nyei eix zuqc mienh zoux doqc wuov deix, maaih njien-youh aqv, weic zuqc maaih Tin-Hungh zoux ninh mbuo nyei Ziouv gunv ninh mbuo.* Mienh zoux hoic mbuo nyei Ziouv Yesu, mienh yaac zoux fih hngv hoic mbuo nyei weic mbuo zoux Ninh nyei sai-gorx. Mbuo oix zuqc a'hneiv se gorngv weic mbuo ei Tin-Hungh zuqc mienh zoux doqc, se gorngv mbuo zoux zuiz zuqc mienh hoic se siou dongh mbuo zuangx nyei. Zuqc mienh zoux doqc maaih njien-youh, maiv zeiz zoux doqc nyei sic mv baac yiem mienh zoux nyei sic mbuo haih maaih njien-youh weic mbuo maai buonc caux Yesu zuqc siouc kouv (1 Bide 3:14 *Mv baac maiv gunv meih mbuo weic zoux horpc nyei javv zuqc siouc kouv, meih mbuo ziouc maaih orn-lorqc*). Oix zuqc bieqc

hnyouv gorngv maiv zeiz nyungc-nyungc dongh mienh zoux doqc nyei bun mbuo maaih njien-youh, weic zuqc maaih nyungc baav sienx Yesu nyei mienh zoux nyei sic hoic ganh. Zoux nyei zuiz, zoux sic dongh maiv puix sienx Yesu mienh nyei sic.

Zuqc mienh zoux doqc duqv njien-youh oix zuqc weic zoux longx nyei sic, zoux weic Ziouv Yesu maiv zeiz weic ganh ziouc maaih njien-youh weic duqv Tin-Hungh gunv jienv mbuo zoux nyei sic.

2. Zoux Yesu Nyei Sai-Gorx Mienh Nyei Maengc

Ging-sou: Lugaa 14:27 *Haaix dauh maiv ndaam jienv ninh ganh nyei ziepc nzaangc jaax gan jienv mingh, wuov dauh yaac zoux maiv duqv yie nyei sai-gorx.*

Gorngv Jiex Gorn Nyei Waac:

Yiem Yesu nyei ga'hlen zanc-zanc maaih mienh camv nyei muangx jienv Ninh gorngv nyei joux-joux waac (**Lugaa 14:25-27** *Mienh camv nyei gan jienv Yesu mingh. Yesu ziouc huin nzuonx mbuox ninh mbuo, "Haaix dauh daaih lorz yie yaac maiv hnamv yie gauh camv hnamv ninh nyei diex maac, ninh nyei auv caux fu'jueiv caux muoz-doic, liemh ninh ganh nyei maengc, wuov dauh maiv haih zoux yie nyei sai-gorx. Haaix dauh maiv ndaam jienv ninh ganh nyei ziepc nzaangc jaax gan jienv mingh, wuov dauh yaac zoux maiv duqv yie nyei sai-gorx.*) Maaih mienh camv daaih gan Yesu weic laaic duqv Yesu oix dorh ninh mbuo mborqv Lomaa janx, weic zuqc Lomaa janx hoic Yiu^tai mienh lauh haic aqv, yaac hoic duqv kouv haic. Mienh gan Yesu weic zix nyungc jauv, mv baac Yesu jiex gorn njaaux ninh mbuo taux *zoux sai-gorx mienh nyei maengc*. Yesu maiv zeiz gorngv gan Ninh fai sienx Ninh duqv naaiv duqv wuov hnavngv ih jaax maaih mienh daaih lorz Yesu oix duqv nyei, Yesu maiv zeiz gorngv gan jienv ninh mingh nor maiv zuqc buangh sic, mv baac Yesu gorngv taux zoux sai-gorx nyei jaax-zinh. Yesu oix ninh nyei sai-gorx mbuo benx ziepc zuoqv nyei mienh, maiv zeiz kungx duqv mienh camv nyei gan ninh hnavngv. Yesu longc i diuh waac fangx gorngv taux oix zuqc hiuv duqv benx sai-gorx nyei maengc caux sai-gorx mienh oix zuqc siev nyei jaax-zinh. (Mangc **Lugaa 14:28-33** *Se gorngv meih mbuo maaih dauh oix gomv norm biauv, ninh maiv zeiz jaa-ndaangc zueiz jienv funx mangc gaax nyaanh gauv zoux duqv ziangx fai maiv ziangx? 29 Ninh maiv funx ndaangc nor, zoux gauv taux ndaamv-jauv ndaamv-jung ziouc guangc jienv. Haaix dauh buate yaac jatv ninh. 30 Ninh mbuo oix gorngv, 'Naaiv dauh lov jiez gorn gomv yaac maiv maaih banh zeic gomv maiv ziangx.' 31 "Fai se gorngv maaih dauh hungh oix mingh caux ganh dauh hungh mborqv jaax, ninh maiv zeiz oix zueiz jienv funx mangc gaax ninh nyei yietc waanc baeng haih mborqv duqv wuov dauh nyei i waanc baeng hingh fai maiv hingh? 32 Funx daaih mborqv maiv hingh nor, wuov deix i waanc corc yiem go nyei, ninh oix zuqc paaiv mienh mingh ndaangc tov gorngv horpc. 33 Fih hnavngv nyei, meih mbuo haaix dauh maiv siev jienv guangc meih maaih nyei yietc zungv, maiv haih zoux maiv duqv yie nyei sai-gorx.) Yesu maiv oix zoux Ninh nyei sai-gorx nyei mienh tuix bouc, mv baac benx muangx Ninh nyei waac nyei mienh, maaih sienx fim nyei mienh, weic zuqc yietc nyungc mbiuv benx sai-gorx nyei mienh fai sai-gorx nyei juoqv-setv se muangx Ziouv nyei waac. Muangx Ziouv nyei waac bun cing duqv goiv yienc nyei maengc. Duqv njoux weic Ziouv nyei en, mv baac duqv njoux nyei mienh muangx Ziouv nyei waac weic zuqc ninh mbuo duqv goiv hnyouv guangc ninh mbuo zoux nyei zuiz. Duqv njoux nyei sienx fim se maiv dan bieqc hnyouv, mv baac sienx, goiv hnyouv guangc zuiz ei jienv Ziouv nyei waac. **Zien-zien zoux Yesu nyei sai-gorx nyei mienh maaih buo nyungc mbiuv.***

Gorngv mengh caux muonc Ging-Sou nyei Eix-leiz:

A. Hnamv Ziouv zoux Da'yietv (Lugaa 14:25)

1. **Yietc joux waac gorngv buo nzunc yiem Lugaa 14:25-33**, *maiv haih zoux maiv duqv yie nyei sai-gorx*. Ndangc Ziouv gorngv naaiv joux waac ninh gorngv ganh joux waac ndangc. Yesu gorngv nyei se Ninh oix zuqc zoux da'yietv yiem mbuo nyei maengc. Oix zuqc hnamv domh mienh diex maac auv jueiv nyei mv baac oix zuqc hnamv gauh zoqc Yesu. Naaiv se benx da'yietv nyungc mbiuv yiem sai-gorx nyei maengc. Hnamv Tin-Hungh!
2. Sai-gorx nyei hnamv bun Ziouv Yesu oix zuqc gauh camv, gauh hlo, gauh ndo baamh gen nyei hnamv, gauh camv hnamv ganh caux ganh nyei maengc. Yesu gorngv, *"Haaix dauh daaih lorz yie yaac maiv hnamv yie gauh camv hnamv ninh nyei diex maac, ninh nyei auv caux fu'jueiv caux muoz-doic, liemh ninh ganh nyei maengc, wuov dauh maiv haih zoux yie nyei sai-gorx*.
3. Maaih yietc laanh janx muangx sienx Tin-Hungh daaih, ninh nyei hmuangv doic gorngv mbuox ninh, "cuotv Tin-Hungh fai cuotv ninh mbuo nyei biauv"...Ninh zuqc ginv...Ninh ginv hnamv Tin-Hungh zoux da'yietv ninh cuotv biauv! Mv baac maiv lauh weic Tin-Hungh nyei en, ninh nyei domh mienh aengx zipv ninh nzuonx weic buatec ninh za'gengh ziepc zuoqv sienx Tin-Hungh. Ziangh biauv mienh sienx weic buatec ninh mbuo nyei sieqv hnamv Tin-Hungh da'yietv, naaiv nyungc mienh za'gengh haih hnamv ganh laanh mienh, hnamv hmuangv doic, hnamv jiu-baang mienh.

B. Ndaam Jienv Ganh nyei ziepc ziepc nzaangc jaax gan jienv mingh (Lugaa 14:27)

1. Yesu gorngv, *Haaix dauh maiv ndaam jienv ninh ganh nyei ziepc nzaangc jaax gan jienv mingh, wuov dauh yaac zoux maiv duqv yie nyei sai-gorx. (Lugaa 14:27; Matv[^]tai 10:38)*
2. Ndaam jienv ganh nyei ziepc nzaangc jaax nyei eix-leiz se haaix nyungc? Yiem wuov gitv nyei lungn ndiev mienh hnavg haaix nor bieqc hnyouv naaiv joux waac? Ziepc nzaangc jaax se haaix nyungc? Maaih mienh laic duqv gorngv ganh zuqc diev kouv nyei fai mienh hoic fai sic yiem maengc nyei jauv. Naaiv se maiv zeiz Yiu[^]tai mienh bieqc hnyouv taux ndaam ganh nyei ziepc nzaangc jaax nyei eix-leiz. Ninh mbuo buatec camv nyei taux mienh ndaam ganh nyei ziepc nzaangc jaax mingh ding daic. Ding jienv yiem wuov diev taux daic.
3. Yesu ganh zoux nyungc zeiv, ninh ginv ndaam, ginv diev weic mbuo nyei zuiz, ninh zuqc siev ninh nyei maengc, zuqc diev kouv, yaac biux mengh gorngv baamh gen nyei ga'naaiv se maiv haih beiv taux ninh zoux nyei gong yiem ziepc nzaangc jaax.
4. Sai-gorx mienh oix zuqc ginv, oix zuqc siev, ginv diev kouv weic Yesu, weic mienh zoux doqc nyei jauv. Mbuo haih guei baamh gen caux baamh gen zoux doic ziouc maiv zuqc ndaam ganh nyei ziepc nzaangc jaax weic mbuo nyei maengc caux ninh mbuo nyei maengc fih hnavg nyei. Mienh maiv ging-borqc meih se gorngv meih caux ninh mbuo zoux sic fih hnavg. Ndaam jienv ganh nyei ziepc nzaangc jaax se maiv zeiz hung heic, maiv zeiz mienh camv ginv nyei. Se gorngv mbuo maiv ndaam jienv ganh nyei ziepc nzaangc jaax, maiv haih zoux ninh nyei sai-gorx.

C. Siev jienv guangc yietc zungv (Lugaa 14:33)

1. Yesu gorngv, “*Fih hnavg nyei, meih mbuo haaix dauh maiv siev jienv guangc meih maaih nyei yietc zungv, maiv haih zoux maiv duqv yie nyei sai-gorx.*” **Da’yiectv** oix zuqc siev hnyouv hnavm nyei, **da’nyeic** oix zuqc siev maengc oix zoux nyei, **da’faam** oix zuqc siev ganh maaih nyei ga’naaiv. Naaiv deix mbuo nyungc siev, aqc jiex bun baamh mienh se siev ganh maaih nyei yietc zungv ga’naaiv. Weic zuqc baamh mienh maaih hnyouv hanc taux baamh gen nyei ga’naaiv.
2. Yesu gorngv “*guangc nzengc yietc zungv maaih nyei ga’naaiv*” Yesu gorngv nyei maaih haaix nyungc eix-leiz? Yie maiv sienx gorngv ninh gorngv nyei heuc mbuo maaic nzengc ga’naaiv fungx bun Jiu-baang, fai bun mienh jomc mienh, mv baac yie sienx gorngv Yesu gorngv nyei eix-leiz se nyungc-nyungc se Ninh nyei. Ninh bun mbuo nyei ga’naaiv mbuo benx goux nyei mienh hnavg maiv dungx zoux sic hnavg mbuo se zoux ga’naaiv nyei Ziouv.
3. Mbuo buatac maaih laanh butv zoih mienh lunx mienh daaih naaic gaax Yesu ninh oix zuqc hnavg haaix nor zoux cingx duqv yietc liuz nyei maengc? **Matv[^]tai 19:21** *Yesu mbuox ninh, “Se gorngv meih oix zoux dunh yunh nyei mienh, oix zuqc mingh maaic nzengc meih maaih nyei ga’naaiv, zorqv wuov deix nyaanh bun mienh jomc mienh. Hnavg naaiv meih ziouc maaih jaaix nyei ga’naaiv siou jienv wuov tin-dorgh. Zoux liuz, daaih gan yie oc.”* Ninh oix zuqc ginv Ziouv fai zinh zoih dongh ninh maaih nyei. Ninh ginv zinh zoih, maiv ginv Ziouv, weic naaiv ninh maiv ginv zoux Yesu nyei sai-gorx.
4. Mbuo maaih nyei ga’naaiv mbuo haih gorngv naaiv se “*yie nyei*” fai “*naaiv se Tin-Hungh bun nyei*” Yie se goux nyei mienh hnavg. Tin-Hungh se zoux Ziouv, mbuo haih gorngv mbuox Ziouv, “*Ziouv aac se gorngv meih oix longc nzuonx nor gorngv mbuox yie*” Naaiv se zoux Yesu sai-gorx mienh nyei maengc, sai-gorx mienh nyei hnyouv, caux sai-gorx fiem fingx.
5. Mbuo hnavg haaix nor zoux sic bun dongh mbuo maaih nyei biux mengh mbuo nyei jiu-tong caux Ziouv. Zoux Yesu nyei Sai-gorx nyei mienh zieqv duqv nyungc-nyungc se Ziouv nyei, sai-gorx mienh se zoux goux nyei mienh hnavg. Mbuo haih ginv, Yie oix bun Ziouv tengx siou yiem Tin-dorgh fai yie oix siou jienv yiem naaiv baamh gen.

Ginv ei Ging-sou nyei waac:

1. Meih hnavm meih nyei domh mienh hnuangv doic gauh camv Ziouv nyei fai?
2. Meih ndaam jienv meih nyei ziepc nzaangc jaax gan jienv Yesu mingh nyei fai? Meih daic weic ganh, ziangh weic Ziouv nyei fai?
3. Meih siev jienv nyungc-nyungc meih maaih nyei weic Ziouv nyei fai? fai meih cinx gor Tin-Hungh bun meih daaih mv baac naanv jienv ziect gor maiv bun Ziouv?
4. Yie za’gengh piatv go gau taux benx Yesu nyei sai-gorx nyei mienh. Meih mbuo niv?

3. Zoux Yesu Nyei Sai-gorx Mienh Nyei Zorngh Zengx

Ging-sou: Yo[^]han 13:35 “*Se gorngv meih mbuo laanh hnamv laanh, zuangx mienh ziouc hiuv duqv meih mbuo zoux yie nyei sai-gorx.*”

Gorngv Jiex Gorn Nyei Waac:

Yesu maiv zeiz heuc ninh nyei sai-gorx mbuo kungx mingh mbuox mienh sienx ninh hnavg, mv baac mingh mbuox mienh zoux ninh nyei sai-gorx. “*Yesu daaih fatv deix mbuox ninh mbuo, “Yiem lungh yiem ndau nyei yietc zungv hatc maaz Tin-Hungh jiu bun yie mi'aqv. Weic naaiv, meih mbuo oix zuqc mingh njaaux maanc fngx mienh zoux yie nyei sai-gorx”* (Matv[^]tai 28:18-19). Zoux sai-gorx nyei mienh se maaih eix-leiz gorngv benx “hoqc nyei mienh” fai gan jienv hoqc nyei mienh. Zoux Yesu nyei sai-gorx nyei mienh se maaih eix-leiz gorngv, hoqc ei Yesu nyei mienh, dongh zipv Yesu njaaux nyei waac caux zipv Yesu zoux Ziouv nyei mienh. Maiv dan yiem sienx nyei jauv mv baac yiem ziangh nyei maengc. Yesu nyei sai-gorx nyei mienh zipv Ziouv njaaux nyei, muangx Ziouv njaaux nyei, ei Ziouv njaaux nyei. Sai-gorx nyei mienh maiv zeiz hoqc weic oix mienh gorngv ninh mbuo se maaih cong-mengh fai guai, ninh mbuo hoqc weic oix ei jienv zoux, ei jienv ziangh dongh ninh mbuo duqv hoqc nyei.

Se gorngv mbuo sienx Yesu, mbuo se zipv yaac laengz zoux Yesu nyei sai-gorx, mbuo benx hoqc nyei mienh hoqc Ziouv nyei mienh. Yesu mienh caux Yesu Sai-gorx wuov joux waac se fih hnavg nyei. Mv baac ih jaax nyei sienx Yesu mienh, maiv oix zoux Yesu nyei sai-gorx hnavg Yesu heuc ninh mbuo zoux nyei, weic zoux sai-gorx nyei mienh oix zuqc siev ganh. Yesu a’hneiv nyei sai-gorx se mienh dongh maiv gunv buangh zuqc haaix nyungc yaac a’hneiv nyei gan jienv Ninh mingh. Yesu njaaux taux buo nyungc jienv nyei eix-leiz taux sai-gorx mienh nyei maengc dongh biux mengh yiem ninh mbuo zoux nyei gong.

Gorngv mengh caux muonc Ging-Sou nyei Eix-leiz:

A. Zanc-zanc ei Ziouv nyei eix-leiz

1. Yesu gorngv mbuox sienx ninh wuov deix Yiutai Mienh, “*Se gorngv meih mbuo zanc-zanc ei jienv yie njaaux nyei waac zoux, meih mbuo za'gengh zoux yie nyei sai-gorx. Meih mbuo ziouc hiuv duqv zien leiz. Zien leiz yaac oix bungx nqoi meih mbuo.*” (Yo[^]han 8:31-32)
2. Mbuo buac cing nyei taux zoux sai-gorx mienh nyei hnyouv fai **ga’nyuoz nyei sic**, Ziouv nyei waac oix zuqc zanc-zanc ziangh, yienc, caux dorh jienv sai-gorx mienh nyei maengc.
3. Mbuo haih zanc-zanc ei jienv Ziouv njaaux nyei waac, weic mbuo doqc, hoqc taux Ziouv nyei waac. Maaih hnyouv oix ei se maiv gaux, maaih hnyouv mv baac maiv hoqc hiuv hnavg haaix nor haih ei? Hoqc liuz, maaih hnyouv ei nyei mienh duqv Singx Lingh tengx qaqv bun sai-gorx nyei mienh haih ei jienv Ziouv nyei eix.
4. Zanc-zanc ei Ziouv nyei waac, fai zorqv Ziouv nyei waac daaih zanx jienv hnyouv maaih eix-leiz gorngv mbuo ginv nyei, zoux nyei, mingh nyei, mangc nyei, nyungc-nyungc se ei Ziouv nyei waac fai Ging-sou. Zoux Yesu nyei sai-gorx nyei mienh jiex gorn zipv Ziouv nyei waac (Ging-sou), ei Ziouv se biux mengh gorngv sai-gorx zipv.

5. Zoux sai-gorx mienh oix zieqv duqv gorngv ninh mbuo nyei maengc oix ei nzengc Ziouv, maiv zeiz ei ganh. Ziouv nyei za'eix bun sai-gorx nyei maengc se gauh longx jiex sai-gorx ganh oix zoux weic Ziouv nyei maengc.
6. Zoux sai-gorx se maiv zeiz, la'guaih oix, la'guaih jorm hnyouv ziouc zoux wuov zanc, buatec mienh camv zoux, buatec duqv longx fai, naaiv nyungc sai-gorx maiv gan Yesu lauh mv baac haih tuix bouc nyei. Weic maiv zieqv duqv zoux sai-gorx nyei jaax-zinh za'gengh ndongc haaix jaaix. Liemh zeh hnamv liemh zeh zoux wuov nyungc sai-gorx hnamv maiv tong, zaih dangh nziouv zanc ziouc piatv Ziouv nyei waac weic ninh mbuo maiv njiec gorn ndoqv wuonv yiem Ziouv nyei waac.
7. Maaih deix sai-gorx laengz gan nyei mv baac laengz gan camx baav wuov nyungc mienh maiv kangv siev ganh oix nyei, hanc nyei, maiv kangv zieqv maiv nyunc bun Ziouv zoux Ziouv gunv ninh mbuo nyei maengc.
8. Zoux sai-gorx nyei mienh oix zuqc bieqc hnyouv gorngv Tin-Hungh ei ninh ganh nyei eix zoux nyungc-nyungc. Ninh zoux nyei maiv doix-dekc ninh nyei fiem fingx. Ninh se hnavg **I^saa^yaa sou 64:8** gorngv, "*Mv baac Ziouv aac, meih corc zoux yie mbuo nyei Die. Yie mbuo zoux ba'naih nie, meih se nanv nie zaangc. Yie mbuo yietc zungv benx meih nyei buoz-dauh zoux nyei gong*". Weic Ziouv zoux mbuo nyei Die, dongh mbuo maiv ziepc zuoqv gan ninh zoux ninh nyei sai-gorx nyei ziangh hoc mbuo ziouc zuqc mborqv njaaux, "*Mbuo nyei cien die mborqv njaaux mbuo se ziux ninh mbuo buatec horpc zuqc njaaux nyei, yaac weic dangh baav hnavg. Mv baac Tin-Hungh mborqv njaaux mbuo se weic bun mbuo duqv longx yaac weic bun mbuo hnavg ninh nor, cing-nzengc.*" (**Hipv^lu 12:10**).
9. Zanc-zanc ei jienv Ziouv nyei waac is maiv zeiz hungh heic. Weic naaiv mbuo oix zuqc ging jienv hnyouv, mbungh jienv, longc ziangh hoc hoqc caux doqc Ziouv nyei waac, ziux yiex fei fangv Ziouv nyei waac, buih mingh buih daaih Ziouv nyei waac, jangx Ziouv nyei waac, dorh Ziouv nyei waac daaih hietv jienv hnyouv, bungx hnyouv Ziouv nyei waac, sienx Ziouv nyei waac. Hnavg **Hipv^lu 4:2** gorngv nor, *Yie mbuo haiz liuz kuv fienx hnavg ninh mbuo haiz nor. Mv baac ninh mbuo haiz liuz nyei kuv fienx maiv tengx haaix nyungc ninh mbuo, weic zuqc haiz liuz ninh mbuo yaac maiv sienx. Mbuo oix zuqc bun Ziouv nyei waac ziangh jienv mbuo (Ko^lo^si 3:16 Oix zuqc zaangh Giduc nyei doz buangv meih mbuo nyei hnyouv ziouc longc nyungc-nyungc cong-mengh laanh njaaux laanh, laanh kuinx laanh. Yaac oix zuqc baaux singx nzung, caux ceng Tin-Hungh nyei nzung, caux Singx Lingh bun mienh benx cuotv nyei nzung, longc hnyouv laengz zingh Tin-Hungh.)*

B. Zanc-zanc hnamv Ziouv nyei eix-leiz

1. **Yesu gorngv**, "*Ih zanc yie bun diuh siang-lingc meih mbuo, mbuox meih mbuo laanh oix zuqc hnamv laanh. Yie hnavg haaix nor hnamv meih mbuo, meih mbuo oix zuqc hnavg wuov nor laanh hnamv laanh. Se gorngv meih mbuo laanh hnamv laanh, zuangx mienh ziouc hiuv duqv meih mbuo zoux yie nyei sai-gorx*" (**Yo^han 13:43-35**)
2. Naaiv yienc Ging-sou gorngv taux **ga'nyiec nyei sic**, mbuo mangc duqv mbuotec nyei sic fai mbuo caux mienh hnavg haaix nor jiu-tong nyei sic. Mbuo duqv buatec cing nyei gorngv, zoux Yesu nyei sai-gorx nyei mienh maiv daan kungx hoqc taux Yesu njaaux nyei waac, mv baac ei Ziouv nyei waac. Yesu hnavg haaix nor hnamv mbuo, mbuo yaac zuqc laanh hnavg naaiv nor hnamv laanh. Naaiv diuh siang lingc heuc

- mbuo hnamv, maiv zeiz gorngv ninh mbuo zic duqv fai puix duqv, fai hungh heic, weic mbuo hnamv Ziouv mbuo ei jienv ninh gorngv nyei waac hnamv mienh.
3. Yesu hnavg haaix nor biux mengh ninh nyei hnamv? Mbuo horpc zuqc zuotc ninh nyei nyungc zoux. Yesu nyei hnamv se “*siev*” nyei hnamv, ninh maiv hnamv taux ganh nyei nza’hmien buonc. Yesu nyei hnamv se “*guangc zuiz*” maiv longc mienh zoux dorngc nyei hnamv, Ninh daaih njoux nyei mienh zoux doqc ninh, maiv zipv ninh, cai ninh. Maiv gunv Ninh zeiz mienh daaih, baamh mienh mangc piex Ninh, mv baac dongh mienh zorqv Ninh ding yiem ziepc nzaangc jaax nyei ziangh hoc, Ninh guangc mienh nyei zuiz, ninh maiv longc mienh nyei zuiz. Ninh njaaux Bide gorngv guangc mienh nyei zuiz se maiv zeiz siec nzunc, mv baac maiv zuqc sauv weic hnamv. Yesu ganh nyei maengc biux mengh ninh nyei hnamv, Ninh buangh zuqc nyei mienh, ninh tengx maiv gunv haaix nyungc mienh haaix nzangh mienh, ninh maaih ziangh hoc bun mienh, zien hnamv se bun dongh mienh maiv haih javv fai winh nyei mienh.
 4. Sai-gorx mbuo nyei mbiuv se laanh hnamv laanh, zien hnamv bun doic se benx yietc nyungc zorngh zengx gorngv mbuo se benx Yesu nyei sai-gorx. Dongh maiv sienx nyei mienh buac sienx nyei mienh laanh hnamv laanh ninh mbuo haih zieqv duqv gorngv Yesu nyei sai-gorx se hnavg naaic. Maiv gunv mbuo haih zunh doz, haih daux gaux, haih fongc-horqc, haih siev mbuo nyei ga’naaiv bun mienh, mv baac maiv maaih hnamv mbuo zoux nyei maiv jaax-zinh (1 Ko^{lin}to 13:2 *Se gorngv yie maaih zingh nyeic haih douc Tin-Hungh nyei waac, yaac haih mengh baeqc yietc zungv maiv gaengh mbiaangx yaangh nyei sic, yaac maaih nyungc-nyungc wuonh zaang, yaac maaih sienx fim henv, zungv haih heuc duqv mbong tuix, mv baac yie maiv hnamv mienh, yie ziouc maiv zic zinh aqv.*)
 5. Mbuo nyei hnamv oix zuqc jiex gorn zieqv duqv Tin-Hungh se hnamv nyei gorn, Mbuo hnamv Tin-Hungh weic Ninh hnamv mbuo, mbuo ziouc haih liouc Ninh nyei hnamv bun taux mienh. Naaiv se weic zuqc yiem hnyouv liouc cuotv taux ga’nyiec dongh mienh haih mangc duqv buac nyei.

C. Zanc-zanc ziangh biouv nyei eix-leiz

1. **Yesu gorngv**, “*Se gorngv meih mbuo ziangh jienv yie, yie nyei waac yaac ziangh jienv meih mbuo, meih mbuo tov haaix nyungc meih mbuo ziouc duqv wuov nyungc aqv. 8 Se gorngv meih mbuo ziangh biouv gitv, meih mbuo ziouc bun mienh taaih yie nyei Die. Hnavg naaic meih mbuo ziouc benx yie nyei sai-gorx*” (**Yo^{han} 15:7-8**).
2. Naaiv yiemc Ging-sou bun **mangc faux fai gu’nquaic nyei sic** taux zoux sai-gorx nyei mienh. Zoux sai-gorx nyei mienh maiv haih maiv ziangh biouv, maiv ziangh biouv se doix-dekc taux zoux sai-gorx nyei eix-leiz. Se gorngv sai-gorx nyei maengc maiv ziangh biouv mbuo maiv haih gorngv mbuo se Yesu nyei sai-gorx (Mbuo buac cing Singx Lingh ziangh nyei biouv yiem **Gaa^{laa}tie 5:22-23** *Mv baac Singx Lingh bun nyei se, * Gikc waac gorngv “Singx Lingh ziangh nyei biouv se...” bun mienh maaih hnyouv hnamv mienh, bun mienh maaih njien-youh, maaih baengh orn, maaih noic, maaih hnyouv korv-lienh mienh, zoux longx nyei sic, maaih ziepc zuoqv nyei hnyouv, zoux hnyouv suonc, haih gunv duqv ganh. Naaiv deix yietc zungv javv leiz-lac maiv haangh*)
3. Ziangh biouv gitv se maaih haaix nyungc eix-leiz? Biouv se weic bun Ziouv nyei mbuox, bun ninh duqv njang-laangc. Biouv hinc cuotv maaih i nyungc. Biouv yiem

mbuo ganh nyei maengc. Hnangv Gaa^laa^tie sou 5:22-23 wuov nyungc biouv se yiem ganh nyei maengc. Weic Singx Lingh zoux gong yiem mbuo nyei maengc buatc duqv cing ziouc maaih naaiv nyungc biouv. Weic zuqc ndiangx nyei biouv biux mengh taux ndiangx. Mbuo zoux Yesu sai-gorx nyei mienh oix zuqc zuangv Ziouv yiem ga'nyuoz, ga'nyiec, caux gu'nguaic. Da'nyeic nyungc biouv se yiem zoux nyei sic, zoux cuotv daaih bun taux mienh. Yesu heuc mbuo mangc lunglunh ndiev nyei gaeng zuangx, "*Yie mbuox meih mbuo longx-longx nyei mangc wuov ndeic. Cungaeng zuoqc, siou duqv aqv. Ih zanc siou gaeng-zuangx nyei mienh duqv ninh mbuo nyei gong-zinh yaac siou gaeng-zuangx weic bun duqv yietc liuz nyei maengc. Zuangx nyei mienh caux siou nyei mienh ziouc lomh nzoih a'hneiv.*" (**Yo^han 4:35-36**) Biouv se dongh mienh duqv njoux duqv goiv hnyouv guangc zuiz, duqv daaih zoux Yesu nyei sai-gorx nyei.

4. Ziangh biouv se yietc nyungc mbiuv gorngv benx Yesu nyei sai-gorx nyei mienh. Yesu gorngv, "*Yie gorngv zien mbuox meih mbuo, maaih yietc norm cuqv maiv zuangx njiec ndau huv mingh nor, m'daaih dongh wuov nduqc norm cuqv hnangv. Mv baac se gorngv zuangx njiec ndau huv mingh ziouc cuotv daaih duqv camv aqv.*" (**Yo^han 12:24**). Yesu gorngv haih ziangh biouv weic zuqc daic. Yesu daic weic zuangx mienh. Mbuo zoux Yesu sai-gorx nyei mienh oix zuqc zuotc Yesu nyei nyungc, hnangv bou oix zuqc zuotc Ziouv nyei nyungc (**Matv^tai 10:25**)

4. Zoux Yesu Nyei Sai-Gorx Mienh Nyei Ginv

Ging-sou: Lugaa 9:61 *Aengx maaih laanh gorngv mbuox Yesu, "Domh Gorx aah! Yie oix gan meih mingh mv baac yie tov nzuonx mbuox dangh yie nyei hmuangv doic."*

Gorngv Jiex Gorn Nyei Waac:

Yesu yangh jienv jauv mingh Ye^lu^saa^lem zingh nyei ziangh hoc, ninh longc qiangx njaaux caux orn ninh nyei sai-gorx mbuo yaac longc qiangx ndouv sai-gorx mbuo gorngv taux gan ninh nyei eix-leiz (Lugaa 9:57-62). Ninh longc buo laanh mienh zoux nyungc zeiv, naaiv deix buo laanh mienh mienh ndam mengh gorngv Yesu zoux ninh mbuo nyei Ziouv nyei, ninh mbuo yaac zoux Yesu nyei sai-gorx nyei, mv baac taux ziangh hoc ginv fai zuqc seix nyei ziangh hoc biux mengh ninh mbuo maiv zeiz. Weic zuqc zoux sai-gorx nyei gong-zinh se hniev nyei. Yesu longc buo laanh mienh laengz nyei waac zoux nyungc zeiv njaaux taux zoux Ninh nyei sai-gorx nyei mienh, zoux ninh nyei sai-gorx nyei mienh se zorqv ganh nyei buoz nanv jienv laih lingh bieiv, mv baac haih maaih ziex nyungc haih yuoqc ninh fai nduov ninh mangc pien bun ninh maiv haih laih maiv zaqc, "*Haaix dauh nanv jienv laih bieiv laih lingh mv baac ninh huin nzuonx mangc nqa'haav, wuov dauh maiv puix yiem Tin-Hungh nyei guoqv.*" Mbuo oix mangc taux naaiv deix buo nyungc fai buo nzangh mienh:

Gorngv mengh caux muonc Ging-Sou nyei Eix-leiz:

A. Huang-huangh zang-zang nyei laengz zoux sai-gorx nyei mienh.

1. *Ninh mbuo gan jienv jauv mingh gau, maaih laanh mienh mbuox Yesu, "Maiv gunv meih mingh haaix, yie oix gan meih mingh."* (**Lugaa 9:57**) Naaiv laanh mienh maiv zuqc fai

maiv zeiz Yesu heuc mv baac ninh ganh laengz. Ninh gorngv duqv longx gor, Maiv gunv meih mingh haaix yie oix gan meih mingh. Ninh laengz nyungc-nyungc. Ninh laengz nyei mienh maiv cai, mienh sienx gorngv za'gengh ziepc zuoqv nyei.

2. Mv baac Yesu hiuv nzengc baamh mienh nyei hnyouv, **Yo[^]han 2:25** "*Yesu maiv qiemx zuqc haaix dauh mbuox ninh baamh mienh hnavg haaix nor, weic zuqc ninh ganh hiuv duqv mienh nyei hnyouv*" Yesu hiuv duqv naaiv laanh mienh maaih hnyouv nyei, mv baac ninh maiv gaengh mbenc ziangx za'gengh hnavv tong taux zoux Yesu nyei sai-gorx nyei jaax-zinh. Yiem Matv[^]tai wuov buonv sou gorngv mengh nyei "*maaih dauh njaaux leiz nyei fin-saeng daaih lorz Yesu. Ninh gorngv, "Fin-saeng aah! Maiv gunv fin-saeng mingh haaix, yie oix gan meih mingh aqv."* (**Matv[^]tai 8:19**). Yesu hiuv duqv ninh huang-huangh zang-zang nyei laengz zoux Yesu nyei sai-gorx, mv baac zuov taux maaih domh sic ninh haih namx hnyouv. Ninh se hnavg gomv biauv mienh maiv funx ndangc maaih zinh gaux fai maiv gaux wuov nyungc mienh.
3. Pou-tong mienh nor za'gengh a'hneiv zipv naaiv nyungc mienh zoux sai-gorx, mv baac Yesu dau nyei waac biux mengh Ninh za'gengh faix fim nyei. "*Yesu gorngv mbuox ninh, "Hieh juv maaih kuotv yiem, norqc yaac maaih lauz, mv baac yie, Baamh Mienh nyei Dorn, maiv maaih dorngx bueix hitv kuonx."* (**Lugaa 6:58**) Bide mv baac gorngv mbuox Yesu fih hnavg nyei, "*Bide gorngv mbuox Yesu, "Maiv gunv ninh mbuo yietc zungv guangc Sai-Diex, yie yietc liuz maiv guangc."* (**Matv[^]tai 26:33**) Yesu gorngv mbuox Bide, "*Yie gorngv zien mbuox meih. Ih muonz, jai zungv maiv gaengh nqaaix, meih zungv maiv nyiemc yie buo nzunc."* (**Matv[^]tai 26:24**)
4. Maaih hnyouv huang-huangh zang-zang oix zoux Yesu nyei sai-gorx se maiv horpc zuqc nzunc-nzunc gorngv dangv ninh mbuo, mv baac Yesu buatc duqv cing naaiv laanh mienh nyei hnyouv nyei. Yesu dau nyei se maiv zeiz maiv dangv mv baac koi ninh nyei m'zing bun ninh haih mangc duqv buatc gorngv zoux sai-gorx nyei jaax-zinh se haaix nyungc. Yesu gorngv nyei se "*meih a'hneiv huang-huangh zang-zang nyei laengz mv baac meih hiuv meih laengz nyei dorh meih mingh nyei fai?*" Maaih mienh huang-huangh zang-zang oix sienx Yesu mv baac maiv hiuv yaac maiv hnavv taux sienx nyei eix-leiz, fai sienx liuz oix zuqc ei nyei eix-leiz.
5. Yesu gengh zingx yaac ziepc zuoqv nyei bun taux laanh laanh mienh dongh oix gan Ninh caux zoux ninh nyei sai-gorx nyei mienh weic zuqc Yesu oix sai-gorx mbuo ziepc zuoqv yaac oix sai-gorx mienh hnavv tong funx longx liuz cingx sienx nyei mienh. Yesu gorngv nyei se, "*zorqv ziangh hoc, longc ziangh hoc hnavv longx meih za'gengh oix zoux Yesu nyei sai-gorx nyei fai? Se gorngv meih ginv nanv jienv laih bieiv meih maiv horpc zuqc huin nzuonx. Meih laengz siev nyungc-nyungc nyei fai, guangc nzengc nyungc-nyungc weic Ziouv nyei fai? Laengz maiv maaih dorngc yiem weic Ziouv nyei fai? Laengz diev weic Ziouv nyei fai?* Yie buatc cing naaiv nyungc sai-gorx nyei maengc yiem Yesu ginv nyei sai-gorx.
6. Zoux sai-gorx nyei mienh za'gengh oix zuqc hiuv duqv ninh mbuo ginv nyei. Weic naaiv ih jaax hnoi sienx Yesu mienh fai zoux sai-gorx nyei mienh za'gengh oix zuqc hiuv ninh mbuo sienx nyei fai zoux nyei. Maiv dungx la'guaih huang-huangh zang-zang nyei sienx fai laengz zoux Yesu nyei sai-gorx, i ziox hnoi hnavv ziouc namx mi'aqv wuov nyungc. Hnavv Yesu gorngv taux hlaaz nyim nyei waac beiv nor, nyim ndortv zuqc nqimv lomc nyei dorngx. Hlo duqv sieqv nyei mv baac zuqc baamh gen nyei ga'naaiv mborngz jienv.
7. Hnavv domh jien, maiv heuc baeng mingh mborqv jaax cuotv liuz ninh mbuox baeng taux ninh mbuo nyei win-wangv, taux ninh mbuo hnavv haaix nor mborqv cingx hingh,

Yesu gorngv nyei waac se dongh naaiv aqv. Oix zoux ninh nyei sai-gorx nyei mienh oix zuqc hiuv jiu-tong caux Ninh. Yiem ih gitv lungn ndiev mbuo buat cing nyei baamh gen nyei ga'naaiv za'gengh baeng jienv mienh, zoux Yesu nyei sai-gorx nyei mienh za'gengh oix zuqc ging jienv hnyouv. Weic zuqc ih gitv lungn ndiev camv nyei hnamv taux minc zinh duqv longx duqv njien-youh nyei jauv, zoux Yesu nyei sai-gorx nyei mienh oix zuqc hnamv longx, hnamv tong, hnamv dingc. Maiv maaih haaix nyungc haih wuonv cuotv liuz Yesu Giduc, nyungc-nyungc yiem naaiv baamh gen liemh zeih haih jiex nzengc, Mbuo oix zuqc hnavg Apc^laa^ham nor guangc jienv nyungc-nyungc gan jienv Ziouv heuc ninh mingh nyei deic bung, maiv gunv ninh maiv hiuv nyei deic bung mv baac ninh hiuv duqv Ziouv dorh jienv ninh (**Hipv^lu 11:8-10**). **Zoux Yesu nyei sai-gorx se maiv zeiz hungn heic, mv baac benx longx jiex nyei maengc. Mbuo haih ndortv nzengc nyungc-nyungc mv baac duqv nyungc-nyungc dongh baamh gen maiv hiuv taux nyei orn lorqc caux yietc liuz nyei maengc.**

B. Maiv zunv hnyouv maiv longc nzengc hnyouv gan nyei sai-gorx mienh.

1. *Yesu aengx mbuox laanh mienh, "Gan yie mingh maah!" Wuov laanh mienh dau, "Domh Gorx aah! Yie tov nzuonx mingh biopv yie nyei die ndaangc."* (**Lugaa 9:59**) Da'nyeic laanh mienh nyei nyungc zeiv se ninh ganh maiv ginv zoux Yesu nyei sai-gorx, mv baac Yesu heuc ninh "*Gan yie mingh maah*" Ninh dau nyei waac bun cing gorngv ninh hnyouv maiv dingc, ninh corc hnamv maiv tong. Ninh gorngv nyei se bun yie zoux dangh yie nyei hmuangv doic nyei gong ndangc. Da'yietv laanh mienh huang-huangh zang-zang nor da'nyeic naaiv laanh se sam-samh soqc-soqv nyei.
2. Naaiv laanh mienh buatc zoux sai-gorx nyei jauv se maiv jienv, benx kungx nor zoux wuov nyungc sic. Yiem **Matv^tai 8:21** biux mengn gorngv ninh za'gengh maiv zunv hnyouv zoux sai-gorx weic zuqc ninh maaih ganh nyei jauv fai gong daaih ndangc Yesu paaiv ninh nyei gong.
3. Maaih mienh camv hnavg naaiv laanh mienh nor, Yie gan meih nyei mv baac bun yie zoux dieh fai ganh nyungc ndangc. Maaih eix-leiz gorngv yie zoux Yesu nyei sai-gorx se gorngv yie maiv maaih haaix nyungc zoux, fai sung nyei, fai mbienc nyei bun yie nor. Naaiv nyungc sai-gorx mienh, Yesu se maiv jienv bun ninh. Ih jaax hnoi buatc naaiv nyungc sai-gorx mienh za'gengh camv. Se gorngv mbienc fai kungx nor mingh buoqc zangc nyei, se gorngv kungx nor mingh hoqc Ging-sou nyei mv baac se gorngv maaih ganh nyungc gauh oix nor ziouc maiv kungx bun Ziouv mi'aqv. Mbuo maaih ziangh hoc bun dongh jienv bun mbuo nyei. Maaih zinh zoux dongh jienv bun mbuo fih hnavg.
4. Maaih mienh buatc Yesu dau nyei waac, "*Sueih daic mingh nyei mienh ganh biopv ninh mbuo nyei daic mingh nyei mienh aqv. Meih gunv mingh zunh Tin-Hungn zoux Ziouv gunv mienh nyei kuv fienx.*" (**Lugaa 9:60**) hnavg jang gorngv dae daic zungv maiv dungx biopv wuov nyungc. Yiem wuov gitv lungn ndiev se dorn hlo nyei gong biopv diex maac se jienv bun ninh mbuo nyei fingx. Se gorngv ninh maiv biopv nor zuqc mienh mangc daiv maiv dan gorngv ninh zoux nyei maiv tongx nimc diex maac hnavg. Mv baac yiem ninh mbuo nyei fingx "*gorngv tov nzuonx mingh biopv yie nyei die ndangc*" se maiv zeiz gorngv dae daic mi'aqv za'gengh mingh biopv wuov nyungc. Mv baac naaiv joux waac nyei eix-leiz se bun yie nzuonx mingh liuc leiz hmuangv doic nyei jauv ndangc. Weic naaiv **Yesu dau nyei waac maaih eix-leiz gorngv oix zuqc bun Yesu zoux Ziouv ndangc nyungc-nyungc**. Nyungc-nyungc mbuo oix zuqc zoux nyei se maiv haih beiv taux Tin-Hungn heuc mbuo zoux nyei jienv fai jaaix.

5. Tin-Hungh ninh cau-fim taux hmuangv doic nyei, Ninh gorngv nyei waac doix-diuc taux dongh ninh gorngv heuc fu'jueiv tongx nimc diex maac, goux diex maac se yietc nyungc mbiuv gorngv taux tongx nimc nyei fangx. Hmuangv doic se jienv mv baac Tin-Hungh oix zuqc gauh jienv jiex. Yesu mengh nyei gorngv taux zoux sai-gorx yiem **Lugaa 14:26** *Haaix dauh daaih lorz yie yaac maiv hnamv yie gauh camv hnamv ninh nyei diex maac, ninh nyei auv caux fu'jueiv caux muoz-doic, liemh ninh ganh nyei maengc, wuov dauh maiv haih zoux yie nyei sai-gorx.* Se gorngv mbuo gin v bun Yesu zoux da'yietv yiem mbuo nyei maengc, sai-gorx mienh za'gengh maiv piatv weic zuqc Yesu laengz bun nyei fuqv gauh longx jiex mbuo haih hnamv duqv zaic nyei. Naaiv za'gengh aqc bun taux haengh douh nyei mienh weic zuqc ninh mbuo mingh go zunh kuv fiex, yiem biau v maaiah dae maa gox aqv, oix zuqc hnangv haaix nor zoux? Se gorngv haih se mangc douc zuov taux die maac daic mingh aengx borqv jienv zoux mv baac cuotv liuz naaic se gorngv domh mienh diex maac haih goux ganh nyei oix zuqc mingh zunh kuv fiex. Maaiah maiv sienx nyei muoz doic, fai sienx fim hei nyei mienh ging-borqc nyei mv baac sai-gorx mienh oix zuqc ei Ziouv paaiv nyei waac.
6. Maaiah mienh maiv gunv zoux longx nyei mv baac zoux maiv doix-dangc. Hmuangv doic se jienv nyei, maaiah mienh longc ziangh hoc caux hmuangv doic caux fu'jueiv zoux ziex nyungc, mv baac dongh jienv jiex wuov nyungc maiv zoux, zoux Yesu nyei sai-gorx se jienv jiex wuov nyungc aqv. Maaiah ziangh hoc zoux ziex nyungc, mv baac maiv maaiah ziangh hoc buoqc zangc Tin-Hungh. Zoux sai-gorx nyei mienh oix zuqc siev, zoux sai-gorx nyei mienh oix zuqc huang jienv mingh zunh kuv fiex. Weic zuqc mienh zuqc ndortv deic nyuoqc weic zuiz, cuotv liuz sienx Yesu maiv haih duqv njoux (**Yo^han 8:24**)

C. Ndamh hnyouv fai i maengc hnyouv nyei sai-gorx mienh.

1. *Aengx maaiah laanh gorngv mbuox Yesu, "Domh Gorx aah! Yie oix gan meih mingh mv baac yie tov nzuonx mbuox dangh yie nyei hmuangv doic."* (**Lugaa 9:61**) Da'yietv laanh mienh huang-huangh zang-zang nyei laengz, da'nyeic laanh mienh sum-sumh soqc-soqv maiv huang, da'faam laanh mienh se "mv baac" wuov nyungc mienh. Ninh hnamv taux ganh nyei nza'hmien buonc ndangc Tin-Hungh.
2. Yesu dau, *"Haaix dauh nanv jienv laih bieiv laih lingsh mv baac ninh huin nzuonx mangc nqa'haav, wuov dauh maiv puix yiem Tin-Hungh nyei guoqv."* (**Lugaa 9:61**). Yesu dau nyei waac biux mengh taux baamh mienh nyei yietc nyungc sic: ***Ninh nyei hnyouv se yiem biau v, maiv caux Ziouv yiem.*** Yesu hiuv naaiv nyungc mienh zaih dangh nziouv zanc, ninh dauh nqang nzuonx biau v aqv. Zoux sai-gorx nyei mienh za'gengh maaiv ziex nyungc baeng mbuo caux tor mbuo. Maaiah mienh hnangv naaiv laanh mienh nor, gan camx baav Yesu zoux sai-gorx nyei, mv baac maiv lauh maaiah nyungc baav daaih zoux bun ninh mbuo maiv gan Yesu. Baamh gen za'gengh maaiv camv nyungc yuoqc mbuo baeng mbuo, nduov mbuo guangc jienv jiex bun mbuo nyei, benx sai-gorx dongh ziangh biouv gitv bun Tin-Hungh duqv njang-laangc wuov nyungc sai-gorx (**Yo^han 15:8**)
3. Mbuo buatc dorn g jaa nyei m'sieqv dorn daaih caux ninh nyei nqox yiem, se gorngv ninh zanc-zanc hnamv taux ninh nyei biau v, ninh nyei maa caux dae caux nziex fai nauz fai gorx fai nor za'gengh aqc bun ninh haih ziepc zuoqv zoux kuv auv bun ninh nyei nqox. Zoux auv nyei mienh oix zuqc haih siev duqv ninh ganh nyei hmuangv doic weic duqv caux ninh nyei nqox benx yietc norm sin. Maiv gunv hmuangv doic yiem biau v se longx nyei mv baac duqv nqox longx za'gengh gauh longx jiex ziouc haih siev jienv ganh nyei

biauv zong daaih caux nqox yiem. Zoux sai-gorx nyei mienh fih hnavg nyei mbuo nyei hmuangv doic za'gengh longx haic, mv baac duqv zoux Ziouv nyei bou zoux sai-gorx za'gengh gauh longx jiex, ziouc bun mbuo nyei hnyouv haih diev duqv siev duqv nyungc-nyungc liuz gan jienv Yesu mingh.

4. Yesu heuc sai-gorx mienh zoux nyei za'gengh aqc nyei, hnavg mienh jiex jough liuz, aengx liouh jienv jough wuov hnamv oix daux nqang, mv baac buov guangc jough mingh maiv haih nzuonx aqv wuov nyungc fangx. Zinh ndangc maaih laanh haengh douh yangh nzangv mingh zoux haengh douh, taux dorngx, ninh buov guangc nzangv mingh, buatc nyei mienh maiv bieqc hnyouv ninh zoux nyei sic yiem gorn, mv baac nqa'haav ninh mbuo buatc cing nyei gorngv ninh zoux nyei maaih eix-leiz gorngv ninh maiv daux nqang, ninh sienx dingc Tin-Hungh heuc ninh mingh zoux nyei gong, zoux haengh douh ninh maiv maaih yietc diemv hnyouv oix daux nqang.
5. Maaih mienh camv maaih ziex nzunc oix mingh zoux Ziouv nyei gong nyei "mv baac"...maiv gunv mv baac haaix nyungc yaac baac. Maiv dungx dorh daaih dangv Ziouv paaiv Ziouv heuc meih zoux nyei gong.

Ginv ei Ging-sou nyei waac:

1. Tov Tin-Hungh tengx mbuo, maiv dungx bun mbuo huang-huangh zang-zangc laengz gan Yesu zoux sai-gorx mv baac maiv hiuv mbuo laengz nyei.
2. Tov Tin-Hungh bun mbuo maiv dungx sum-sumh soqc-soqv nyei nqaih maiv zoux Yesu nyei sai-gorx, maiv zoux dongh ninh paaiv mbuo zoux nyei.
3. Tov Tin-Hungh bun mbuo nanv jiev laih beiv nyei mienh maiv dungx huin nqang, maiv dungx tuix bouh, maiv dungx jaev sin gorngv yie oix nyei lorqc mv baac....

5. Zoux Yesu Nyei Sai-gorx Mienh Nyei Ziouv

Ging-sou: Yo^han 13:13 “*Meih mbuo heuc yie zoux Sai-Diex yaac zoux Ziouv. Meih mbuo gorngv duqv horpc nyei weic zuqc yie za'gengh zeiz aqv*” **Gong-zoh 10:36** “*...Yesu Giduc zoux maanc muotc nyei Ziouv.*”

Gorngv Jiex Gorn Nyei Waac:

Haaix dauh zoux meih nyei ZIOUV wuov joux waac se benx yietc nyungc jienv nyei waac naaic yiem gitv-gitv lung hndiev. Naaiv zoux waac waac naaic taux hmuangv doic, jiu-baang doic, yiem nyei dorngc. Weic maiv oix mbuoqc maiv oix ei zoux bun deic bung, zoux bun hmuangv doic, jiu-baang doic maaih sic camv, maaih waac nyei sic cuotv camv. Mangc mbuo ganh yiem nyei dorngc hiuv duqv aqv. Deic bung mienh waic mienh maiv mbuoqc hung hja ziouc maaih waic sic camv, Giduc mienh maiv mbuoqc Ziouv ziouc maaih sic camv. Mbuo buatc cing nyei norm-norm nzangv maaih nzangv Ziouv, buonc-buonc mienh mienh biauv ziouv, norm-norm deic bun maaih hung hja daaih bun mienh haih zoux ei jienv horpc zuqc zoux nyei sic.

Mbuo naaic ganh nyei waac se, **haaix dauh zoux mbuo nyei Ziouv?** Sienx Yesu mienh maaih i joux waac dau hngv. Bun Tin-Hungh zoux Ziouv fai ganh zoux ziouv. Ging-sou mengh nyei gorngv Yesu Giduc se zoux maanc muotc nyei Ziouv.

Gorngv mengh caux muonc Ging-Sou nyei Eix-leiz:

A. Yesu Giduc se zoux Njoux Ziouv

1. Se gorngv meih gorngv meih sienx Yesu, meih sienx Ninh se zoux meih nyei Njoux Ziouv, meih yaac oix zuqc bun Ninh zoux Ziouv gunv meih nyei maengc, oix zuqc mbuoqc Ninh ei Ninh nyei waac.
2. Maaih mienh pienx Ging-sou nyei waac gorngv, sienx Yesu nyei mienh se nyiemc zuiz fai gan jienv mienh dorh ninh mbuo gorngv deix waac liuz ziouc benx Yesu nyei sai-gorx nyei mienh fai benx sienx Yesu nyei mienh mi'aqv. Ninh mbuo maiv zuqc ei fai mbuoqc Yesu zoux ninh mbuo nyei Ziouv, fai ei Ziouv nyei waac yiem ninh mbuo nyei maengc. Naaiv nyungc sienx fai njaaux se doix-dekc Ziouv nyei waac yiem Ging-sou. Se gorngv mbuo doqc Yaagorpc sou mbuo buatc cing nyei kungx sienx hngv maiv ei jienv zoux se maiv lamh longc (**Yaagorpc 2:17,20**)
3. Mbuo za'gengh haih zipv Yesu zoux mbuo nyei Njoux Ziouv mv baac maiv bun ninh zoux Ziouv gunv mbuo nyei maengc nyei fai? Yie sienx gorngv maiv haih. Mbuo duqv njoux fai njoux en se maiv zeiz sienx longc nzuih gorngv hngv fai sienx mienh gorngv nyei waac, mv baac sienx Yesu caux Ninh gorngv nyei waac caux zoux nyei gong, weic Yesu daic bun mbuo duqv ziangh, weic mbuo sienx, ziouc duqv Tin-dorngh Diex guangc mbuo nyei zuiz (Lomaa 8:1).
4. Za'gengh maiv zeiz jauv yietc dangh, haih gorngv yie sienx Yesu nyei mv baac maiv bun Ninh zoux Ziouv gunv maengc, Maiv ei Ninh nyei waac caux za'eix. Mbuo sienx Yesu nyei ziangh hoc mbuo maiv zeiz zipv Njoux Ziouv hngv, mbuo zipv Ninh zoux mbuo nyei Ziouv fai maaih eix leiz gorngv mbuo nyunc bun Ninh gunv.
5. Maaih camv nyei sienx Yesu mienh weic ninh mbuo maiv hoqc fai mienh maiv njaaux ninh mbuo bun ninh mbuo haih za'gengh zipv Yesu zoux ninh mbuo nyei Ziouv gunv ninh mbuo nyei maengc. Mbuo zoux nyei, ziangh nyei biux mengh taux haaix dauh zoux mbuo nyei Ziouv. Tin-Hungh fai Ganh zoux ziouv gunv ganh nyei maengc.

B. Yesu Giduc heuc mbuo zoux ninh nyei sai-gorx

1. Yesu maiv dan heuc mbuo sienx Ninh, mv baac heuc mbuo zoux ninh nyei sai-gorx. Zoux sai-gorx se gauh ndo deix ginv sienx hngv fai sienx Ging-sou gorngv nyei waac hngv. Sai-gorx nyei mienh hoqc taux Ziouv, weic oix ei jienv Ziouv zoux. Yesu paaiv ninh nyei sai-gorx mbuo mingh njaaux mienh zoux Ninh nyei sai-gorx (Matv[^]tai 28:20), maiv dan kungx sienx Yesu hngv (Sienx se benx jiex gorn). Maaih mienh sienx nyei sienx daaih lauh haic aqv mv baac maiv zoux Yesu nyei sai-gorx, hoqc hiuv Ziouv, muangx Ziouv nyei waac, bun Ziouv gunv maengc.
2. Bide zunh da'yietv nzunc doz bun janx wuov fingx muangx yiem Ko[^]ne[^]li[^]atc nyei bauv, Bide gorngv Yesu Giduc se maanc muotc nyei Ziouv (Gong-zoh 10:36). Mv baac Bide ganh yaac maaih ziangh hoc maiv zieqc duqv yaac maiv bun Yesu Giduc zoux Ziouv gunv ninh. Ndangc Bide mingh Ko[^]ne[^]li[^]atc nyei biauv, ninh buatc hinc yaangh nyei sic, ninh *“Buatc lungh gaengh nqoi. Aengx maaih nyungc ga'naaiv hngv yietc kuaaiv ndie jangv nyei, yaac hngv nanv jienv bie norm gorqv bungx*

- njiec taux ndau nor. 12 Wuov kuaaiv ndie gu'nyuoz maaih nyungc-nyungc saeng-kuv, nyungc-nyungc hieh zoih, nyornng ndau nyei ga'naaiv, caux ndaix ndaamv-lungh nyei norqc. 13 Ninh aengx haiz qiex gorngv, "Bide aah! Jiez sin daaih daix naaiv deix ga'naaiv nyanc aqv." 14 Mv baac Bide gorngv, "Ziouv aah! Maiv horpc nyanc saah? Oix zuqc gec nyei caux maaih uix nyei ga'naaiv yie maiv nyanc jiex." (Gong-zoh 10:13-14).* Bide maiv muangx Ziouv heuc ninh zoux nyei zuov taux Tin-Hungh gorngv ninh. Se gorngv Yesu Giduc zoux Ziouv gunv ninh nyei maengc, ninh maiv haih gorngv "Maiv horpc nyanc se gorngv gorngv Ziouv gorngv nyanc duqv". Ninh gorngv nyei doix-dekc Ziouv.
3. Mbuo mouz laanh maaih ziangh hoc zoux hngangv Bide nor. Singx Lingsh yiem mbuo nyei hnyouv heuc mbuo zoux nyei (doux gaux, doqc Ging-sou, mbuox mienh taux kuv fieng, fongc-horqc, guangc mbuo zoux nyei zuiz, fai heuc mbuo mingh zoux Ziouv nyei gong) mbuo hngangv Bide nor gorngv, maiv horpc yie zoux saah! Maiv zeiz saah! sueih ganh laanh mienh zoux duqv aqv!
 4. Yesu gorngv mbuox mienh camv yiem **Lugaa 6:46** "Meih mbuo weic haaix diuc heuc yie, 'Ziouv aah! Ziouv!' yaac maiv ei jienv yie mbuox nyei waac zoux? Heuc Yesu zoux Ziouv se maiv zeiz waac nzamc hngangv. Maiv maaih haaix nyungc fai haaix dauh haih beiv duqv Ziouv (**I^saa^yaa 26:13**). I^saa^laa^en mienh maiv oix ngaengc Tin-Hungh, mv baac ninh mbuo sueih ganh nyungc zienh, bun ganh nyungc zienh daaih torngv jienv ninh mbuo caux Tin-Hungh nyei jiu-tong. Mv baac Tin-Hungh maiv bun yietc nyungc daaih torngv fai nqaevq weic oix bun I^saa^laa^en mienh ziepc zuoqv nyei bun Ninh. Maiv maaih guai nyei auv bun mienh juangc ninh nyei nqox longc fai guai nyei nqox bun mienh juangc ninh nyei auv longc. Maiv maaih guai nyei nqox bun mienh juangc longc ninh nyei auv. Mv baac I^saa^laa^en mienh hngangv naaic zoux, sienx zorpc se hngangv naaiv nyungc fangx nor. Weic naaiv sienx Tin-Hungh nyei mienh maiv horpc zuqc sienx zorpc. Zorqv mienv nyei jauv daaih zorpc sienx Tin-Hungh nyei jauv se hngangv i laanh m'jangc juangc laanh auv nor. Tin-Hungh zeix mbuo daaih ninh nzaeng jienv mbuo.
 5. Ih jaax hnoi, mbuo nyei zienh se (sa'eix lorz zinh nyanh nyei jauv fai haaix nyungc dongh dangv jienv maiv bun Tin-Hungh zoux da'yietv yiem sai-gorx mienh nyei maengc. Maaih zix nyungc zienh zorqv mbuo nyei ziangh hoc, zorqv mbuo nyei oix fai mauv). Zienh se maiv dan kungx miuh fangx dongh mienh longx buoz zoux nyei hngangv. Meih nyei zienh se nyungc-nyungc dongh gauh jienv Tin-Hungh yiem meih nyei maengc. Zoux gong lorz zinh maiv dorngc lorqc mv baac zoux mauv camv gor ziouc guangc maiv mingh buoqc zangc Ziouv se benx zienh. Naaiv se yietc norm nyungc zeiv hngangv.
 6. Horpc zuqc nor, dongh mbuo sienx Yesu wuov zanc mbuo horpc zipv Ninh bun Ninh gunv mbuo nyei maengc. Se gorngv mbuo maaih qiangx, longc qiangx mbuox mienh taux kuv fieng nyei ziangh hoc, oix zuqc gorngv mengh zoux Yesu sai-gorx nyei jaax-zinh. Maaih mienh camv gorngv taux sienx Yesu nor, kungx gorngv taux sienx Tin-Hungh mienh duqv nyei daaih gorngv (duqv siang maengc, duqv yietc liuz nyei maengc, duqv caux Tin-Hungh horpc hnyouv, duqv ndutv zuiz, duqv hingh jiex mienv), Maiv gorngv taux sienx nyei mienh sienx liuz oix zuqc hngangv haaix nor ziangh. Weic naaiv yiem mbuo naaiv norm jiu-baang, meih mbuo duqv haiz camv gorngv taux sienx liuz oix zuqc ziangh nyei maengc. Mbuo maiv horpc zuqc nzauh mienh maiv oix sienx, horpc zuqc mbuox zien sienx nyei eix-leiz, zoux sai-gorx nyei

- eix-leiz bun sienx nyei mienh a'hneiv nyei ginv. Yesu gorngv mengh nyei hngangv gomv biauv mienh fai hngangv mborqv jaax mienh oix zuqc fun ndangc cingx zoux, oix zuqc funx ndangc, zaah ndangc cingx sienx.
7. Baulo nyei maengc zoux nyungc zeiv, sienx baac Yesu ziouc naaic gaax, “*Ziouv aah! Yie oix zuqc hngangv haaix nor zoux?*” (**Gong-zoh 22:10**) Ninh naaic nyei bun cing gorngv ninh mbuoqc Yesu zoux Ziouv, ninh bun Yesu zoux Ziouv gunv ninh nyei maengc, Ziouv heuc mbuo zoux haaix nyungc sai-gorx zuqc ei. Yiem naaic jiex mingh Baulo maiv tuix bouc taux daic, za'gengh bun Yesu zoux Ziouv yiem ninh nyei maengc. Yiem Siang-Ngaengc Waac nyei ziangh hoc, haaix laanh mienh dorng zuangx gorngv ninh mbuo sienx Yesu fai zoux Yesu nyei sai-gorx nyei mienh ziouc yienc ninh mbuo zoux nyei sic, weic zuqc sienx Yesu se hngangv naaiv nor, Yesu maaih hatc maaz gunv nyungc-nyungc nzengc yiem mbuo nyei maengc, mbuo nyunc bun Ninh zoux Ziouv. Naaiv se doix-dekc taux baamh gen caux baamh mienh nyei hnyouv oix nyei, weic zuqc baamh mienh maiv oix bun mienh gunv oix ei ganh nyei hnyouv hanc zoux. Mv baac sienx Yesu nyei mienh, Singx Lingh haih gunv jienv mbuo nyei hnyouv, haih bun mbuo maaih hnyouv ei Zangc Diex.
 8. Se gorngv meih nyei maengc za'gengh bun Yesu zoux Ziouv, yiem meih sienx Ninh wuov zanc, wuov nzunc hnoi oix zuqc naaic ganh, Yesu za'gengh zoux Hunggh, zoux Ziouv gunv nyungc-nyungc, norm-norm dorngc, yiem yie hnoi-hnoi nyei maengc nyei fai? Fai meih ganh zoux ziouv gunv meih ganh nyei maengc zoux dongh meih ganh oix zoux nyei ei jienv baamh mienh caux baamh gen nyei jauv. Kauv ganh nyei hnyouv ziouc hiuv duqv haaix dauh zoux ziouv yiem meih nyei maengc.

C. Yesu Giduc zoux Ziouv nyei eix-leiz

1. Mbuo mangc muonc deix taux Yesu zoux Ziouv nyei eix-leiz. Se gorngv Yesu zoux Ziouv maaih eix-leiz gorngv mbuo mbuoqc nzengc Ninh, ei nzengc Ninh nyei hatc maaz. Hngangv **1 Bide 3:15** gorngv nor, *Yiem meih mbuo nyei hnyouv meih mbuo oix zuqc taaih Giduc, bun ninh zoux Ziouv*. Mienh nyei waac gorngv oix zuqc taaih Giduc yiem janx Gikc nyei waac se benx hatc nyei waac. Maiv zeiz gorngv oix fai maiv oix wuov nyungc. Se gorngv mbuo gorngv mbuo sienx Yesu nyei mienh, mbuo zoux ninh nyei sai-gorx nyei mienh, Yesu se zoux Ziouv fai mbuo zuqc mbuoqc nzengc Ninh. Hngangv Baulo gorngv mbuox Lomaa zingh mienh nor, *Weic naaiv Giduc daic mingh aengx nangh daaih weic oix zoux ziangh jienv nyei mienh caux daic mingh nyei mienh nyei Ziouv*. (**Lomaa 14:9**)
2. Mbuo maaih Yesu zoux Ziouv nyei mienh oix zuqc mbuoqc Ziouv, ei Ziouv...Hngangv Yesu njaaux mienh daux gaux nor gorngv, nyungc-nyungc ei meih nyei za'eix cuotv daaih. Mbuoqc maaih eix-leiz gorngv ei Ziouv oix nyei, naaiv se aqv bun mbuo mv baac longx bun mbuo.
3. Zipv Yesu zoux Ziouv nyei mienh oix zuqc zieqv duqv nyungc-nyungc se Tin-Hunggh nyei (**Gong-zoh 10:36** *Maanc muotc nyei Ziouv*) maaih eix-leiz gorngv nyungc-nyungc se Ninh nyei, ninh yaac goux jienv nyungc-nyungc. Cuotv liuz mbuo zieqv duqv naaiv yiem mbuo zoux nyei sic, Yesu zoux Ziouv gunv mbuo se benx gorngv nyei waac hngangv maiv zeiz ziangh yiem maengc nyei sic. Mbuo se Tin-Hunggh nyei weic Ninh zeix mbuo daaih, Ninh zuoqc mbuo nzuonx daaih, mbuo oix zuqc mbuoqc Ninh. Yietc zungv mbuo maaih nyei se Tin-Hunggh bun mbuo goux hngangv, Ninh se zoux nyungc-nyungc nyei Ziouv. Weic Ninh nyei hnamv, en, caux fuqv bun mbuo

hngv. Baulo gorngv mbuox Ti^{mo}^tai “Oix zuqc hatc yiem naaiv baamh gen nyei butv-zoih mienh maiv dungx zoux maux, yaac maiv dungx kaux zinh nyaanh, weic zuqc zinh nyaanh se kaux maiv wuonv. Oix zuqc kaux Tin-Hungh, dongh ceix nyungc-nyungc camv nyei bun mbuo, weic bun mbuo njien-youh” (1 Ti^{mo}^tai 6:17)

4. Mbuo benx Tin-Hungh nyei sai-gorx hngv, fai benx mienv nyei sai-gorx caux jienv? Hngv Yesu ganh gorngv nor, meih zoux nyei biux mengh haaix dauh zoux meih nyei Ziouv. Kungx Tin-Hungh gunv meih nyei hnyouv hngv fai? Maaih haaix norm dorngx yiem mbuo nyei maengc dongh maiv bun Yesu zoux Ziouv gunv?
5. Muangx waac fai ei Ziouv nyei waac se benx yietc nyungc mbiuv gorngv mbuo benx Ninh nyei sai-gorx. **Lugaa 6:46** Yesu gorngv, “*Meih mbuo weic haaix diuc heuc yie, ‘Ziouv aah! Ziouv!’ yaac maiv ei jienv yie mbuox nyei waac zoux?* Yiem hnyouv za’gengh muangx Ziouv nyei waac nyei mienh se bun cing nyei gorngv maaih Ziouv gunv ninh mbuo nyei maengc nyei mienh. Maiv muangx waac fai ei Ziouv nyei waac bun cing mbuo laengz nyei fai gorngv nyei maiv zien. Mbuo zoux nyei, gorngv gauh mbui mbuo laengz nyei fai nyiemc nyei. **Sai-gorx nyei mbiuv se maiv zeiz yiem mbuo gorngv nyei mv baac zoux nyei.**

Ginv ei Ging-sou nyei waac:

1. Se gorngv meih zieqv duqv Yesu zoux maanc muotc nyei Ziouv, meih yaac zipv ninh zoux meih nyei Ziouv gunv nyungc-nyungc sic yiem meih nyei maengc, meih oix ziangh meih nyei maengc ei jienv ninh nyei waac. Mv baac maaih ziangh hoc meih mau, nzunc baav meih oix ei mv baac ginv dorngc. Meih hngv haaix nor haih zanc-zanc ziangh doix-dangc nyei maengc zanc-zanc bun Ziouv gunv jienv mbuo nyei maengc? Baulo dau, *Weic naaiv yie oix meih mbuo hiuv duqv maaih Singx Lingh dorh nyei mienh maiv haih gorngv, “Bun Yesu zuqc zioux aqv.” Fih hngv nyei, cuotv liuz Singx Lingh dorh nyei mienh, maiv maaih haaix dauh haih gorngv, “Yesu zoux Ziouv.”* (1 Ko^{lin}^to 12:3)
2. Singx Lingh bun zoux Yesu nyei sai-gorx nyei mienh haih zanc-zanc bun Ziouv gunv jienv, zoux da’yietv yiem sienx Yesu mienh nyei maengc. Singx Lingh tengx mbuo zorqv mbuo nyei hnyouv leih baamh gen, bun mbuo nyei hnyouv haih mingh nitv fatv Yesu, mbuo nyei Ziouv. Singx Lingh bun qaqv mbuo dongh mbuo mau nyei ziangh hoc bun mbuo haih ei jienv Ziouv nyei za’eix zoux.

6. Zoux Yesu Nyei Sai-gorx Mienh Nyei Doic

Ging-sou: 2 Ko^{lin}^to 13:14 *Tov Ziouv Yesu Giduc ceix en bun meih mbuo zuangx mienh. Tov bun meih mbuo hiuv duqv Tin-Hungh hnamv meih mbuo, yaac tov Singx Lingh bun meih mbuo laanh caux laanh jiu tong*

Gorngv Jiex Gorn Nyei Waac:

Zoux Ziouv nyei sai-gorx fai zoux Ziouv nyei gong nyei mienh za’gengh jienv, gong za’gengh jienv haic. Ganh zoux se maiv hingh. Mbuo laanh horpc zuqc yaac qiemx zuqc tengx jienv doic zoux. Weic zuqc Ziouv nyei waac heuc mbuo zoux yiem Ging-sou nyei za’gengh aqc. Hngv **Matv^{ai} 5:48** “*Meih mbuo oix zuqc dunh yunh, hngv meih mbuo nyei tin-dorng Diex nor,*

dunh yunh.” **1 Bide 1:16** *Weic zuqc Ging-Sou gorngv, “Meih mbuo oix zuqc cing-nzengc weic zuqc yie se cing-nzengc nyei.” E^fe^so 5:20 “Yaac oix zuqc dengv mbuo Ziouv Yesu Giduc nyei mbuox zanc-zanc weic maanc sic laengz zingh Zaangc Diex Tin-Hungh.” Fi^lipv^poi 4:6* *Maiv dungx weic haaix nyungc gaaax hnyouv. Oix zuqc weic nyungc-nyungc sic daux gaux jough Tin-Hungh, laengz zingh Tin-Hungh, ei meih mbuo qiemx longc nyei tov ninh tengx.” 1 Te^saa^lo^ni^gaa 5:17 “Yaac oix zuqc maiv dingh liouh nyei daux gaux”*

Naaiv yietc zungv hatc nyei lingc caux leiz mbuo ganh hhangv haaix nor haih ei? Pou-tong mienh hhangv haaix nor haih zoux duqv? Mbuo hhangv haaix haaix nor haih ziangh hhangv Ziouv nyei waac heuc mbuo nor. Mv baac Tin-Hungh maiv heuc mbuo zoux haaix nyungc se gorngv ninh hiuv duqv mbuo maiv haih. Ninh maiv heuc mbuo zoux se gorngv ninh hiuv duqv mbuo haih piatv. Weic naaiv Tin-Hungh: Singx Dorn Yesu Giduc gorngv ninh mingh zangc diex wuov, Ninh cingx paav Tin-Hungh Singx Lingh daaih tengx mbuo, bun mbuo haih maaih qaqv haih ei Ziouv nyei za'eix. Tin-Hungh Diex zungv liuc leiz ziangx bun mbuo weic Tin-Hungh Singx Lingh hhangv Baulo daux gaux gorngv nor, “Tov Singx Lingh bun meih mbuo laanh caux laanh jiu-tong” (**2 Ko^lin^to 13:14**) mv baac janx Gikc nyei waac “jiu-tong” wuov jough waac maaih eix-leiz gorngv juangc jienv weic Singx Lingh. Singx Lingh zoux nyei gong tong taux mbuo bun mbuo zoux Yesu nyei sai-gorx nyei mienh haih yangh ei jienv Ziouv nyei eix, caux haih zoux zorngh zengx ei jienv Ziouv. Caux Tin-Hungh, Singx Lingh juangc gong zoux se mv daaih dongh wuov jough waac yiem **Lugaa 5:7** *Simon mbuo ziouc yaapv ninh mbuo nyei zorqv mbiauz doic dorh wuov poux nzangv daaih tengx. I poux nzangv maaih mbiauz buangv nzengc. Nzangv kaav deix zemh aqv.*

Gorngv mengh caux muonc Ging-Sou nyei Eix-leiz:

A. Mbuo nyei doic (Singx Lingh) nyei fiem fingx

1. Mbuo sienx gorngv Singx Lingh se Tin-Hungh (Diex, Dorn, Singx Lingh). Maiv maaih haaix nyungc qaqv, za'eix, cong-mengh bun mbuo haih zoux duqv dongh Tin-Hungh heuc mbuo zoux nyei cuotv liuz Singx Lingh tengx mbuo.
2. Mienh camv la'kuqv, Tin-Hungh Singx Lingh, fai maiv bangc taux Ninh. Mv baac Ninh maiv dingh liouh nyei zanc-zanc yiem sienx Tin-Hungh Yesu nyei mienh nyei hnyouv tengx tov, tengx qaqv, tengx za'eix, tengx dorh hlo yiem Ziouv nyei waac.
3. Yesu taux ziagh hoc leih ninh nyei sai-gorx mbuo, Ninh gorngv mengh nyei taux Singx Lingh dongh Orn Mienh Nyei Hnyouv wuov dauh oix daaih orn sai-gorx mbuo nyei hnyouv. Yesu heuc ninh nyei sai-gorx zaah ninh mbuo ganh nyei hnyouv yiem **Yo^han 14:7** *“Se gorngv meih mbuo za'gengh hiuv duqv yie, meih mbuo ziouc hiuv duqv yie nyei Die. Yangh naaiv jiex meih mbuo hiuv duqv ninh, meih mbuo yaac buatc jiex ninh”*
4. Yesu borqv jienv gorngv, *“Se gorngv meih mbuo hnamv yie, meih mbuo ziouc ei jienv yie nyei lingc zoux. Yie oix tengx Zaangc Diex tov, ninh ziouc oix bun ganh dauh daaih tengx meih mbuo, caux meih mbuo yietc liuz yiem. Naaiv dauh se Singx Lingh, dongh bun mienh hiuv duqv zien leiz wuov dauh. Baamh mienh maiv haih zipv ninh, weic zuqc baamh mienh mangc maiv buatc ninh yaac maiv hiuv duqv ninh. Mv baac meih mbuo hiuv duqv ninh nyei, weic zuqc ninh caux meih mbuo yiem yaac yiem meih mbuo nyei hnyouv” (Yo^han 14:15-17).* Yiem naaiv deix i ziex yiemc Ging-sou, Yesu gorngv nyei eix-leiz se gorngv mbuo hiuv duqv Ninh, mbuo hiuv Zangc Diex,

mbuo hiuv Singx Lingh. Weic zuqc Zangc Diex se longx nyei Die, Singx Lingh se bun cing mbuo hiuv duqv naaic.

5. *Zorng-zengx gorngv Singx Lingh maaih fiem fingx: Singx Lingh maaih cong-mengh zaah toux nyungc-nyungc (1 Ko^{lin}to 2:10-11); Singx Lingh nzauh (E^{fe}so 4:30); Singx Lingh ei ninh ganh nyei za'eix} (1 Ko^{lin}to12:11)*

B. Mbuo nyei doic (Singx Lingh) nyei mouz deic

1. Mbuo juangc jienv zoux maiv gunv haaix nyungc, juangc gong zoux nyei mienh oix zuqc laanh bungx hnyouv laanh, maaih mouz deic fih hngv, yaac oix zuqc buatc caux. Yesu Giduc bun Tin-Hungh Singx Lingh daaih zoux sai-gorx mienh nyei doic, mangc jienv sai-gorx mbuo zoux nyei nyungc-nyungc weic Tin-Hungh Diex yiem naaiv seix zangc. Weic naaiv Tin-Hungh zanc-zanc caux mbuo yiem! Mbuo nyei sin se Singx Lingh nyei dinc (**1 Ko^{lin}to 6:19**).
2. Yesu gorngv Singx Lingh nyei gong se " *Ninh oix bun mienh taaih yie ziouc dorh yie nyei waac daaih gorngv mbuox meih mbuo*" (**Yo^{han} 16:14**). Tin-Hungh Singx Lingh nyei gong se bun mienh taaih Tin-Hungh: Singx Dorn Yesu Giduc. Se gorngv za'gengh caux Singx Lingh zoux doic juangc gong zoux, mbuo nyei mouz deic fih hngv nyei maaih hnyouv bun mienh taaih Tin-Hungh (Diex, Dorn, caux Singx Lingh).
3. Singx Lingh zoux nyei gong bun cing gorngv ninh se Tin-Hungh. Yiem zeix lungx ndau nyei ziangh hoc (**Tin-deic douh 1:2**); *Yiem fiev Ging-sou nyei ziangh hoc (2 Bide 1:21; 2 Ti^{mo}tai. 3:16); Yiem Doz benx dauh baamh mienh (Lugaa 1:35); Yiem mienh sienx Yesu nyei ziangh hoc (Yo^{han} 3:6); Yiem orn mbuo nyei hnyouv nyei ziangh hoc (Yo^{han} 14:16); Yiem mbuo tov nyei ziangh hoc(Lomaa 8:26); Yiem mbuo sienx liuz yaac goux mbuo benx cing-nzengc mienh (2 Te^{saa}loⁿⁱgaa 2:13)*

C. Mbuo nyei doic (Singx Lingh) nyei mengh sing

1. Mbuo piatv camv weic zuqc mbuo maiv bieqc hnyouv taux Singx Lingh nyei mengh sing. **Mbuo zoux Yesu nyei sai-gorx nyei mienh longc Singx Lingh, maiv zeiz bun Singx Lingh longc mbuo.** Gi^{nde}on nyei maengc se benx yietc norm nyungc zeiv gorngv taux naaiv weic zuqc ninh zieqv duqv Singx Lingh nyei mengh singx, ninh bun Singx Lingh longc ninh, "*Ziouv nyei Singx Lingh ziouc njiec daaih yiem Gi^{nde}on. Gi^{nde}on ziouc biomv jorng heuc Aa^{mbi}ye^{se} Mienh daaih zunv gan ninh mingh*" (**Domh Jien 6:34**) Weic Gi^{nde}on sueih Tin-Hungh longc Ninh, ziouc bun Ziouv nyei mienh haih duqv hingh. Oix zuqc bun Singx Lingh nyei douz zieqc yiem hnyouv hngv Mose buatc douz yiem ndiangx nor, mv baac maiv zieqc ndiangx wuov nyungc zieqc yiem mbuo nyei hnyouv (Cuotvⁱyipv 3:3-5).
2. Zoux Yesu nyei sai-gorx nyei mienh oix zuqc zieqv duqv Tin-Hungh Singx Lingh nyei mengh sing, mbuo oix zuqc taaih Tin-Hungh: Diex, Dorn, Singx Lingh.
3. Singx Lingh maaih Tin-Hungh nyei fangx zeiv fai fiem fingx: Kungx Singx Lingh ganh hiuv duqv Tin-Hungh hnamv nyei sic (**1 Ko^{lin}to. 2:11-12**); Ziouv yiem norm-norm dorngx (**Singx Nzung 139:7**); Nernh jiex wuov dauh (**Yopv 33:4**); Singx Lingh zoux Zien Leiz (**1 Yo^{han} 5:6b**); Singx Lingh bun haih daic nyei sin nangh daaih (**Lomaa 8:2;11**); Singx Lingh Maaih nyungc-nyungc congh mengh (**I^{saa}yaa 40:13**)

4. Se gorngv mbuo zoux ei jienv Singx-Lingh nyei gong fai caux Tin-Hungh juangc gong zoux, mbuo oix zuqc hiuv cing yaac mengh nyei gorngv mbuo nyei gong ginc.
5. **Da'yietv** mbuo oix zuqc ei Ging-sou, wuov nyungc mbuo oix zuqc hiuv duqv Ging-sou gorngv nyei waac, cingx haih ei jienv Ging-sou nyei waac zoux. **Da'nyeic**, mbuo oix zuqc longc nzengc hnyouv, qaqv, cong-mengh, caux ziangh hoc zoux Ziouv nyei zorn-g-zengx (**Gong-zoh 1:18**) Hnangv Ziouv ganh nor, zoux sai-gorx nyei mienh oix zuqc siev ganh nyei maengc weic taaih Tin-Hungh. **Da'faam**, Oix zuqc bun nzengc fai fungx nzengc nyungc-nyungc bun Yesu.

D. Mbuo nyei doic (Singx Lingh) za'gengh longc haic.

1. Gengh longc haic duqv benx Yesu nyei sai-gorx yiem naaiv seix zangc.
2. Doqc Ging-sou nyei ziangh hoc, Singx Lingh bun mbuo mengh baeqc Ging-sou (2 Ko^{lin}to 4:6).
3. Daux gaux nyei ziangh hoc, Singx Lingh tengx mbuo dongh mbuo mau nyei ziangh hoc (Lomaa 8:26)
4. Yiem zoux Ziouv nyei gong nyei ziangh hoc, Singx Lingh bun mbuo maaih qaqv (Gong-zoh 1:8)
5. Yiem mbuo nyei maengc, Singx Lingh yienc mbuo bun mbuo gauh zuangv mbuo nyei Ziouv Yesu Giduc (2 Ko^{lin}to 3:18).
6. Singx Lingh zoux nyei bun cing gorngv maaih fiem: Mbuo *muangx duqv singx (Gong-Zoh 10:19-21); Gorngv-baeqc nduov Singx Lingh=se gorngv baeqc nduov Tin-Hungh (Gong-Zoh 5:3); mbuo haaih ngaengc jienv Singx Lingh= maiv muangx Tin-Hungh} (Gong-Zoh 7:51); Mbuo zoux duqv bun Singx Lingh nzauh} (E^{fe}so 4:30); gorngv ki Singx Lingh, Tin-Hungh maiv guangc(Matv^{tai} 12:31-32)*

Mbuo duqv juangc jienv hoqc deix taux zoux Yesu nyei sai-gorx nyei maengc, zoux Yesu nyei sai-gorx nyei eix-leiz, zoux Yesu nyei sai-gorx nyei fuqv, yaac duqv Ziouv nyei waac orn taux mbuo dongh zoux Yesu sai-gorx nyei mienh. Yesu ih zanc yaac fih hnangv nyei heuc mienh gan fai sienx ninh zoux Ninh nyei sai-gorx. Meih zoux ninh nyei sai-gorx nyei fai? se gorngv meih zoux nyei nor meih bun Singx Lingh longc meih ceix sai-gorx nyei fai? . Mbuo hiuv duqv zoux Yesu nyei sai-gorx se da'yietv oix zuqc zipv Yesu zoux Ziouv (Lugaa 14:25-33). Meih sienx Yesu nyei fai? Duqv zipv Ninh zoux meih nyei Ziouv nyei fai? Duqv sienx liuz nor, oix zuqc benx hoqc nyei mienh, hoqc Ziouv nyei waac, ei Ziouv nyei waac nyei mienh. Zoux Yesu nyei sai-gorx se benx longx haic nyei fuqv bun taux laanh laanh mienh. Laengz zingh Tin-Hungh ginv mbuo heuc mbuo benx ninh nyei sai-gorx. Zoux sai-gorx maiv dan zuotc Ziouv siev jienv ganh nyei maengc, Zoux sai-gorx se benx yietc seix nyei maengc, maiv zeiz haih guangc fai dingh. Ih hnoi, Yesu corc heuc zuiz mienh nzuonx daaih zoux ninh nyei sai-gorx nyei. Mv baac mbuoqc horngh ninh bun qiangx ninh nyei sai-gorx, longc ninh nyei sai-gorx mbuo mingh mbuox mienh daaih zoux ninh nyei sai-gorx (Matv^{tai} 28:18-20).

© Longc Zunh doz qiex/Audio, Fangx Naangh/Video, Zoc Nyei Sou/Writing, caux Fangx Linh/Power Point nyei leiz/policy:

Gunv zorqv mingh longc caux aamx cuotv duqv weic juangc jienv bun Ziouv nyei kuv fienv gormx lungv ndiev. Mv baac tov:

1. Oix zuqc aamx cuotv nzengc, maiv dungx gatv (edit-tipv fai zorqv cuotv) zunh doz nyei waac, fiev nyei sou.
2. Maiv haih longc nyanh, maiv gunv meih ganh ndortv aamx nyei zinh.
3. Maiv haih zorqv zunh nyei doz fai fiev nyei sou an meih nyei website kungx haih kuangx/link hnavv cuotv liuz mbuox ndangc.
4. Tov maiv dungx yienc fai pienx Yauzsing gorngv nyei eix-leiz weic maiv oix pien caux pienx Ziouv nyei waac. Tov tengx jienv zorc oc.

Laengz zingh mienh muoz, a'hneiv duqv juangc jienv bun Ziouv nyei kuv fienv haih gormx lungv ndiev.

www.yauzsing.wordpress.com